


WAI



Namba 1739
Wan Wik, Novemba, 22 - 28, 2007

Niuspepa Bilong Yumi Ol PNG Stret!

K1 tasol
long olgeta hap


Dijisel i givim K20,000
long Oro Provins - Pes 2
na moa stori long Pes 20

Polis kilim dai wanpela na holim pasim ol
narapela raskol long stilim balus - Pes 3

K10m no inap kamap gut...



Baim nau
wanpela
Digicel
mobail na
yu bai go
insait lo
dro bilong
nambawan
krismas
shopin
resis!



Gutpela, Bikpela moa Network.

I no olgeta distrik bai inap kisim

Paul Zuvani i raitim

EITI faiv pesen (85%) bilong ol pipel
husat i stap long ol rurel distrik bai i no
inap lukim kaikai bilong K10 milien mani.

Dispela mani em Gavman i tokaut long
K1.7 bilien Septemba 2007 Saplementari
Mani Plen na Tunde dispela wik K8.9 bilien
2008 Mani Plen o Baset bilong em.

Na long mani i no inap go long ol pipel
dispela em bikos long planti asua.


Ol asua em:

- NOGAT inap ol wokman long Fainens opis
long wan wan ol distrik;
- NOGAT gutpela ol saveman bilong lukau-
tim dispela mani;
- NOGAT inap haus bilong ol wokman long
stap na wok; **Moa long pes 3**

Ol polis wetim ol raskol

WAS: Ol polisman i putim was
long rot klostu long ol mango
na solwara we ol raskol husat i
bin stilim balus na mani tasol i
no inap ronawe wantaim i bin
ronawe i kam long en bihain
long ol i mekim ol pallot i pun-
daunim balus long Fisherman
Allan, long Mosbi long Mande.
Wantok Niuspepa i bin ron i go
dispela hap i no longwe long
ples Roku na kisim dispela
poto long taim ol polis i
sutim pinis wanpela long
raskol na pairim dispela
stap. Lukim stori long pes 3

Foto: William Natara



Promotim Seif na Strongpela Sosaiti bilong yumi olgeta!



OCEAN BLUE TUNA

*Gutpela abus tru na
i no dia tumas!*



Taim nogut painim Milen Be



HEVI BILONG REN: Wapela ples i sindaun long maus bilong Wara Ruaba long Kep Vogel eria insait long Milen Be Provins bihain long taitwara i bin abrusim mak bilong nambis na rausim ol haus na gaden bilong ol.
STORI NA POTO: PAUL MAOLAI

TUPELA manmeri i dai pinis na moa long 900 manmeri i nogat ples bilong sindaun bihain long olgeta haus na gaden samting bilong ol i bagarap long han bilong Saiklon Dagu i bin paitim Milen Be Provins las wik.

Ol eria bilong provins we tupela manmeri i dai em long Daga na Biniguni i stap insait long Makamaka lokel level gavman long bus bilong Rabaraba eria.

Ol dispela ples i sindaun long boda namel long ol provins bilong Milen Be na Oro.

Wan wan long ol dispela ples em Apa na Lowa Biniguni.

Ol opisa bilong Milen Be Provinsel Administresen Disasta Opisa na ol Nesenel Disasta na Imejensi Opisa i wok kalap long helikopta i go insait long sekim ples i kisim bikpela bagarap.

Ol Mema bilong Palamen (MP) bilong provins olsem

Samarai Murua MP na Deputi Gavana Gordon Wesley na Alotau Open na Kalsa na Turisim Minista Charles Abel i bin bihainim ol opisa i go insait long ol ples bagarap.

Ol kaikai saplai olsem rais, plawa, wel bilong kuk na ol haus sel em ol i karim pinis long bot i go long Rabaraba na bihain bai helikopta i karim i go insait long ples bagarap.

Moa long 250 beg rais, 11 beg plawa, 10-pela katen wel bilong kuk, ol haus sel, naip, rop na ol baket em ol i tilim pinis.

Mani mak bilong K50,000 we ol i bin makim bilong kisim ol rilif saplai i kam long Nesenel Disasta na Imejensi Opisa i klostu pinis nau na askim i go long Nesenel Gavman pinis long givim sampela moa mani.

Long wankain taim i gat askim tu i kam long Oro long helpim ol boda viles namel long tupela provins.

Moa long K100,000 i mas stap long helpim ol tarangu insait long provins.

Milen Be Disasta Opisa i tok olsem sindaun bilong ol dispela pipel i bagarap olgeta nau.

PNG Salvesen Ami na PNG Red Cross i wok helpim ol pipel i kisim bagarap.

Ripot i kam long ol ausait ailan bilong provins i soim olsem i gat bagarap i kamap, tasol i nogat man i dai.

Milen Be Provinsel Disasta Komiti i bin bung aste (Trinde) long skelim tingting long sindaun bilong dispela hevi.

Milen Be Disasta Opisa i tokaut pinis olsem ol bai traim helpim ol ples long Oro sait bilong boda, tasol namba wan luksave em ol bai givim long ol ples i sindaun long Milen Be sait bilong boda.

Ol dispela hap nau i sindaun wantaim hevi i bin kisim namba wan bikpela mak bilong ren long pundaun insait long provins dispela yia.

Noken kilim ol dolfin na arapela samting i stap aninit long solwara

Michael Novingu i raitim

LUKAUTIM ol dolfin, weil na ol arapela samting i stap aninit long solwara, noken kilim o bagarapim ol.

Minista bilong Envairenmen na Konsavesen, Mista Benny Allan tokim moa long 100 manmeri long wapela bung bilong Melanesian Kepesiti Biling Woksop o bung long Madang las wik olsem yumi mas wok bung wantaim long lukautim ol dolfin, weil na ol arapela samting i stap aninit long solwara bilong yumi.

Mista Allan i tok Papua Niugini (PNG) em i memba kantri we i sainim tok orait long Apia long Septemba 2006 long wok bung wantaim Solomon Ailan, Vanuatu, Australia na ol arapela wan solwara kantri long kirapim gutpela wok long lukautim ol

samting i stap aninit long solwara bilong mipela na ol wan solwara tu.

Em i tok moa olsem mas tingting bilong dispela bung i bilong bildim kepesiti, impruvim save na karimaut aweanes long ol komyuniti long ol memba kantri long lukautim ol samting i stap aninit long solwara.

"Dispela em i gutpela wok long kisim ol turis i kam we ol bai peim sampela mani long lukluk long ol dispela samting long kamapim gutpela sindaun long komyuniti bilong yumi," Mista Allan i tok.

Em i tok tenkyu long PNG Piseris Atoriti (NFA), Dipatmen bilong Envairenmen na Konsavesen, Nesenel Heritis Tras Australia na Weil na Dolfin Konsavesen Sosaiti long Australia long sponsaim dispela bung.

K20,000 long helpim ol lain i bungim birua bilong raunwin

OL PIPEL bilong Oro Provins bai kisim mani mak inap long K20,000 i kam long mobail telepon kampani Dijisel (Digicel).

Dispela mani bai go long baim ol samting ol lain tarangu long provins i mas i gat nau olsem kaikai, marasin na ol taunam o moskito net.

Salvesen Ami, em ol lain husat i wok long go pas long givim helpim long ol lain tarangu, i bin givim bikpela tok tenkyu tru i go long Dijisel.

Long makim maus bilong Salvesen Ami na olgeta tausien famili husat bai kisim helpim, mipela i tok tenkyu long

dispela pasin Dijisel i mekim, Kepten Soddy Maraga husat em i Pablik Rilesens Opisa bilong Salvesen Ami i tok.

Dispela helpim bai givim gutpela sindaun na bel isi long planti bl lain i no sindaun gut moa, em i tok.

Bosman bilong Dijisel Paua Niugini (PNG), Kevin O'Sullivan i tok, "Dijisel i bilip long stap olsem hap bilong komyuniti PNG long na i gat strong-pela bilip bilong helpim ol pipel long taim bilong bikpela bagarap. Mipela i askim ol arapela lain long bung wantaim mipela na helpim ol tarangu long dispela hevi."

Wol Beng i gat bilip long PNG

Paul Zuvani i raitim

BENG bilong planti kantri, Wol Beng i gat bilip Papua Niugini (PNG) Gavman inap kamapim gutpela sindaun.

Na dispela bai kisim taim bipo long kain sindaun i kamap.

Namba tu bos bilong Wol Beng James Adams i tok long taim em i bin mekim raun bilong em long ol wok kamap na opis long Rabaul na Mosbi long dispela wik.

Adams i go bek long Amerika las wik bihain long em kam na mekim raun bilong em long sampela de long dispela wik.

"Mi pilim amamas long kain senis i wok long kamap long wok bilong Gavman," Mista Adams i tok.

Bikpela senis long ikonomi long las 5-pela yia na dispela i kamap bikos long prais bilong oil na ol minerel na moa yet long stap bilong Gavman, em i tok.

Tasol em i tok i gat bikpela salens i stap yet long tanim dispela ol gutpela mak we ol pipel i pilim tru long laip bilong ol.

"Long skruim dispela gutpela

ikonomik gro Gavman i mas bihainim yet Midium Tem Developmen Strateji, Midium Tem Fiskol Strateji na Midium Tem Det Strateji. Gavman i mas tanim dispela gutpela mak i go long ol samting tru tru.

"Nau yet ating bai hat tasol long 5 i go inap long 10-pela yia bihain mi hop ol gutpela samting bai kamap," em i tok.

Em i tok em i amamas tu long ol wok em Gazelle Restoresen Atoriti i mekim na i tok dispela em salens PNG Gavman na ol arapela provins i mas bihainim long kamapim ples bilong ol.

Bihain long PNG i wok wantaim Wol Beng stat long 1976 dispela em i namba wan taim wapela bikpela opisa bilong Beng i mekim wokabaut bilong em long kantri.

Mista Adams husat i gat masta digri long Pablik Afeas na Ikonomiks i gat longpela histori wantaim Wol Beng we i stat wok wantaim Beng long 1974.

Lukim ol stori long 2008 Mani Plen bilong kantri long pes 4.

Ol raskol stilim balus na mani, tasol ol i bungim ol polis

K10m no inap kamap gut

...I no olgeta distrik inap kisim

I kam long pes 1.

- NOGAT gutpela opis long wok na raitim ripot
- NOGAT ol saming bilong yusim long wok long opis;
- NOGAT saveman bilong raitim ol prosek pro-posep na
- LOKEL Memba i no wokbung wantaim ol Fainens na narapela ol opisa long distrik.

Mak bilong dispela ol asua bai lukim as tingting bilong Gavman long givim pawa long ol pipel long ol i mekim wok na sapatim ol yet bai no inap wok.

Sapos dispela ol asua i stap yet na Gavman i go het long givim mani dispela em planti manmeri i bilip inap kamapim sans long ol paul pasin i kamap.

Madang Provins Fainens Opisa Charles Okori husat i kamap tu long bung bilong toksave bilong 2008 Mani Plen i tok Madang i wanpela long ol provins husat i amamas long harim dispela tok-save tasol i no save sapos K10 milien bai kamap tru long ol pipel

"Gavman i no skulim inap ol opisa long go aut long wan wan ol distrik long lukautim dispela mani

"Na sapos em i skulim ol em i mas redim tu haus na opis bilong ol wokman long stap na mekim wok

"Mi wari olsem Gavman i redim gut ples bilong em long lukautim dispela mani na sapos i no kamap dispela mani bai sindaun tasol long Waigani," Mista Okori i tok.

Em i tok nau yet sampela ol distrik i gat wanpela o tupela Fainens opisa na dispela i no inap.

Long lukautim na ronim kain mani wan wan ol distrik i mas gat 10-pela opisa, em i tok.

Em i tok moa olsem dispela mani i gutpela long go wantaim wok bilong Distrik Fainens Rolaut Program we bai wok bilong skulim ol opisa na kamapim ol haus na opis bilong yusim bai stap tu

Wari bilong Mista Okori i wankain long wan bilong Nesenel Plening na Opis bilong Rurel Developmen

Tasol long rot bilong givim dispela mani Plening Opis i tok gat ol rot em wan wan ol distrik i no bihainim tu long Distrik i givim mani

"Mipela i wantaim ol prosek pro-posep na long 14 stap long distrik i bihainim Laisa, Deputi Sekreter Plening Distrik long Nesenel Plening i tok

Long givim mani na long bihainim lo bilong Pabrik i wantaim ol prosek pro-posep na long distrik mas kamap wantaim ol prosek pro-posep long Nesenel Plening i givim na givim tok orat bilong ol i givim aut mani, Mista Laisa i tok.

Long bekim Mista Okori i tok planti ol opis bilong dispela i no save long raitim prosek pro-posep.

"I gat ol lo bilong bihainim na sapos ol distrik i no bihainim ol lo dispela i ken lukim ol pipel i pilim po yet maski i gat mani long helpim ol," em i tok.

Nau yet Opis bilong Rurel Developmen (ORD) opis we i givim aut dispela mani long ol Memba i tok olgeta K4 milien long Saplementari Baset bilong wan wan ol distrik i stap yet long ol tras akaun na dispela bai wankain long K6 milien bilong 2008 Mani Plen.

William Natera i raitim

WANPELA man i dai, 5-pela i stap long han bilong polis, na tripela i hait yet, bihain long polis i tok olgeta i bin wok bung long traim long stilim bikpela mani (bilip em K5 milien) long wanpela balus long Mande.

Tasol Polis Komisina Gari Baki i tok han bilong lo i long-pela na i bai holim yet ol dispela raskol husat i wok long hait i stap na olgeta wantaim i bai kisim mekimsave.

Ripot we i kam long ol polis long Mande apinun i tok olsem dispela balus we ol raskol i bin putim gan long het bilong ol pailot na stilim taim em i ron yet long Tok Inglis ol i tok haijek (highjack), i bin mekim ron bilong Beng Saut Pasifik na i bin laik ron long Mosbi i go long Kiunga na Tabubil taim dispela birua i bin kamap.

Long 9.50 kilok long Mande moning Jackson Ples Balus Kontrol Tawa i bin toksave long Boroko Operesens Senta bilong polis olsem nogut wanpela balus i bungim birua bilong haijek, ripot i tok.

Ripot i tok ol polis, wantaim helpim bilong Papua Niugini Difens Fos, Nesenel Disasta na Imejensi Sevis na-Helifax kampani i bin ron long ol bot, helikopta na balus bilong ol yet long painim dispela haijek balus. Long graun, ol polis i putim ol rot blok.

Long 10:26 kilok long moning ol i lukim dispela haijek balus long Daugo, olupela ples balus we ol balus i no save yusim moa, long Fisherman Ailan, ripot i tok.

Ripot i tok i luk olsem tupela sekyuriti opisa, husat i ol risev polisman tu na i bin i gat wok long was long dispela mani long dispela balus, i bin mekim pasin haijek long dispela balus



ISI TASOL: Dispela polisman i raun insait long mangro na painim ol raskol husat i bin hait insait long hap POTO: POLIS MIDIA YUNIT

na tokim ol pailot long pundaunim long dispela ailan.

Ripot i tok olsem long klostu long 11:55 kilok long moning, ol polis i stopim wanpela kar wantaim draiva bilong en long wanpela rot blok bilong ol. Dispela man i tokaut olsem em i wanpela bilong ol dispela raskol. Ol polis i bilip dispela man i man husat i bin go pas long kamapim dispela birua.

Long 12:30 kilok long apinun ol manmeri long Fisherman Ailan i tokim ol polis olsem tripela man husat i putim ol klos we i bani. Em het na pes

bilong ol na-tupela pailot i bin kalap long bot (dingi) na ron i go long ples Roku long bikpela graun long Mosbi.

Polis i bin painim na holim pasim wanpela bilong ol dispela raskol, na sutim indai narapela wantaim gan taim em, na ol polis i bin pait i go kam wantaim gan. Long dispela taim, polis i bin i wok long painim tupela yet, ripot i tok.

Long Tunde apinun, namba bilong ol raskol husat i bin kari-maut dispela birua i senis. Ol polis i salim aut narapela ripot we i tok olsem ol i holim pasim

5-pela man pinis olsem ol saspek o ol lain we ol polis i bilip i bin wok bung long kamapim dispela birua na tripela saspek i stap hait yet na ol polis i wok long painim ol yet.

I gat ol narapela ripot we i no opisal i kam long polis tu nau olsem ol i gat stori olsem namba tu sekyuriti gad - dispela ol polis i no bin sutim indai - i no bin wanpela bilong ol raskol, na i bin traim long stopim dispela narapela gad. Wok painimaut i wok long go yet.

GENSET SPECIAL

Check your nearest branch November 2007



K957.00
GST INCL

GENPOWER GENERATOR
2KW 4-STROKE
PETROL ENGINE

GENPOWER GENERATOR
650KW 2-STROKE
PETROL ENGINE



K375.00
GST INCL



K2145.00
GST INCL

GENPOWER GENERATOR
5KW 4-STROKE
PETROL ENGINE



K2145.00
GST INCL

GENPOWER GENERATOR
3KW DIESEL ENGINE
HAND START




BISHOP BROTHERS


everything for industry...

www.bishoppbros.com.pg

PORT MORESBY | LAE | PORGERA | MT HAGEN | MADANG | KIMBE | RABAU | VANIMO | HONIARA



NESENEL BASET 2008



OL RIPOOT WANTAIM PAUL ZUVANI

K1.8 bilien Dvelopmen Baset Kamapim ol rot na bringim sevis

Mani mak bilong 2008 Dvelopmen Baset em K1.8 bilien.

Dispela mani i kam long K526.7 milien Gavman dairek fanding, K73.7 milien Takis Kredit na K163 milien konsesinel lons o

dinau.

Wantaim dispela ol mani em K1 bilien i kam long ol prosek gren.

Long taim bilong tokaut long Dvelopmen Baset Minista bilong Nesenel Plening na Memba bilong Pomio

Paul Tiensten i tok dispela em i namba wan taim ol prosek gren i kamap long mak bilong K1 bilien.

"Wantaim bikpela namba bilong ol risos long mekim wok na gutpela fiskol menesmen Gavman wantaim ol poroman bilong em bai bringim dvelopmen i go long ol pipel," Mista Tiensten i tok.

Em i tok Gavman i plen long givim sevis olsem kamapim rifom long publik sekta; bringim gutpela marasin long ol helt senta, sab-helt senta, eid pos; strongim plening, baseting na publik fainens menesmen sistem wantaim kamap bilong sofwea na hatwea dvelopmen; strongim praimer, vokesenel na teknikal skul; skruim yet wok bilong givim skul meterial long ol skul na tren-

im ol gutpela tisa; strongim ol bikpela skul na ol samting bilong ol; sapot Nesenel Stratejik Plen bilong HIV/AIDS na sapotim wok bilong Lo na Jastis Sekta Program.

Em i tok moa long Gavman bai sapotim ol draiva bilong ikonomi olsem agrikalsa, forestri, piseri, turisim na ol liklik bisnisman na sapotim wok bilong ol maining, petroleum na ges na long wankain taim givim luksave olsem busgraun, wara na solwara i stap gut.

Em i tok Gavman bai skruim yet wok bilong sapotim Bogenvil na ol risos provins na long wankain taim sapotim ol distrik we i no dvelop gut; bringim gutpela wara saplai na pawa long ol pipel na long stretim ol rot, bris, pot, jeti na ol arapela ikonomik aset.

AS tingting bilong 2008 Mani Plen o baset em bilong bungim na kamapim ol rot bilong bringim sevis i go long ol manmeri.

Moa yet long lukim sevis i go long ol distrik we i no dvelop gut. Minista bilong Nesenel Plening na Memba bilong Pomio Paul Tiensten i tok taim em i tokaut long 2008 Dvelopmen Baset long Tunde dispela wik.

"Taim mipela i kamapim ol rot long bringim sevis i go long ol pipel dispela i strongim tingting bilong Gavman long kirapim ol wok long ol distrik na ol provins we dvelopmen i ken stap oltaim," Mista Tiensten i tok.

Ol distrik na provins

em we ol bikpela samting bilong mipela i stap, graun na ol risos na bikpela moa em long ol pipel, em i tok.

Long kamapim baset we i lukluk moa long ol distrik em i tok dispela bai gutpela long strongim gro na stap bilong ikonomi.

"Long mekim olsem mipela i lukim yet olsem wok bilong bringim sevis i go long ol pipel i stap bikpela wari bilong mipela yet.

"Rot bilong bringim dispela ol sevis i go long ol pipel i mas kamap isi," em i tok long tingting rot em ol publik sevan i yusim long mekim wok.

Em i tok ol manmeri i harim planti ol stori bilong Gavman i gat



I GO LONG OL PLES: Mista Tiensten.
FAIL POTO

planti mani tasol ol i no lukim kaikai bilong dispela ol toktok.

"Ol i laikim ol guds na sevis i go long ol, helt, gutpela edukesen, gutpela komyuniti we i gat lo na oda, daunim sik AIDS na gutpela skul long mekim wok na strongim ikonomi.



KALSA: Gavman i laik sapotim turisim na pulim moa turis i kam long PNG. Hia em ol lain Hailans long bilas bilong ol wantaim sampela turis. FAIL POTO

PANGTEL

PNG Radiocommunications & Telecommunications Technical Authority

PABLIK NOTIS

Ol Iligel Koneksen na pasin bilong Bagarapim ol Kebol TV Sistem

Jeneral Pablik i mas luksave gut olsem em i brukim lo bilong Telekomyunikesen ekt 1996 (olsem ol i senisim) taim ol i konektim nating o pilai pilai wantaim o bagarapim ol Kebol TV sistem. Ol mekimsave bilong dispela kain bikhet pasin i bikpela tru na ol lain i brukim lo i ken bungim bikpela mekimsave long sait bilong mani o go kalabus.

Ol Kebol TV Opereta husat i gat laisens na jeneral pablik i mas kwiktaim ripot long Polis o PANGTEL taim ol i luksave olsem i gat bagarap i kamap long dispela kain pasin bai i gat wok i go het long daunim dispela kain hevi.

Ol namba bilong ringim long PANGTEL opis bilong mipela long Pot Mosbi o Lae i olsem:

Dairekta Operesens
Telepon: 303 3267
Feks: 300 4829

Rijinel Redio Inspekta
Telepon: 472 7341 / 472 7342
Feks: 472 1045

Tok orait i kam long:
CHARLES S. PUNAHA
EKTING DAIREKTA JENERAL

Baset bilong givim pawa long ol pipel

WOK bilong Tresari nau em long bringim mani i go long ol ruel manmeri o ol manmeri bilong ples na givim pawa long ol long ol i mekim wok na strongim sindaun bilong ol.

Dispela helpim i kamap bikos kantri i lukim gutpela ron bilong ikonomi na gutpela ikonomi i kamap bilong long stap bilong gutpela gavman na long prais bilong salim oil na ol minerol.

Minista bilong Tresari na Fainens na Memba bilong Aitape Lumi, Patrick Pruaitch i tok dispela taim em i tokaut long klostu K9 bilien (K8,999.7 bilien) Mani Plen o baset bilong 2008 long Palamen long Tunde dispela wik.

"Anit long lidasip bilong Prait Minista na wantaim Koporesen bilong ol arapela Minista mi laik lukim olsem kaikai bilong dispela ol hatwok i mas go aut long olgeta distrik," Mista Pruaitch i tok.

Mi laik lukim senis long we gavman sevis i go long ol pipel, moa yet long distrik level," em i tok.

"Na mi laik lukim bikpela hap mani bilong minerol i mas kamapim ol gutpela wok long strongim gro bilong ikonomi na olsem bilong strongim bihainim taim bilong Papua Niugini," em i tok.

Em i tok bikpela as tingting bilong Gavman long kamapim 2008 Mani Plen em long givim pawa long ol pipel bilong Papua Niugini, na

Gavman i bihainim 4-pela as tingting long kamapim 2008 Mani Plen. Dispela 4-pela as tingting em:

- BIHAINIM Medium Tem Dvelopmen Strateji- dispela strateji bai ron i go inap long 2010. Gavman i bihainim bikos anit long dispela strateji Gavman i ken save long ol bikpela hap long givim mani we bai i ken helpim na strongim ikonomi;

- KAMAPIM nupela Midium Tem Fiskol Strateji- Bihainim kamap na longpela taim stap bilong Gavman dispela i lukim Gavman i ken mekim ol wok anit long 5-ya dvelopmen plen bilong em. Taim bilong nau MTFS i pinis na olsem Gavman i mas kamapim nupela MTFS;

- KAMAPIM ol gutpela baset we Gavman i, no ken kisim dinau mani long karim aut ol wok bilong em. Gavman i gat planti mani-tasol long wan kain taim i noken seksek na yusim olgeta mani na i kamapim kain kain ol samting we bihain em bai hat long givim sapot long dispela ol samting na

- ROT bilong karimaut Baset i save hat. Em i wanpela samting long kamapim baset tasol em i narapela samting long karim aut baset. Long dispela as tingting bilong Gavman long karimaut long ol samting sampela taim bai kamap isi isi long wanem Pablik Sevis i mas wok hat na wok hariap.

Givim gaden kaikai i go long ol kalabus lain

OL LAIN we kot i givim mekimsave long ol na nau ol i stap long banis kalabus em gavman i mas idim ol wantaim lokel gaden kaikai maski long rais, tin pis o tin mit.

Dispela em wampela strongpela toktok tru em vais presiden bilong Hailans Famas na Setlas Asosiesen (HFSA), Jonah Buka i mekim.

Mista Buka i tok olsem ol lain gavman ejenisi we i lukautim ol banis kalabus i mas lukluk long kamapim sampela kain rot we ol lokel fama i ken karim ol gaden kaikai i go long ol banis kalabus.

Taim yu salim ol gaden kaikai long ol lokel banis kalabus long kantri, mani bai stap insait long kantri, em i tok. - James Kila

Stopim 'Hai Lo' laki pilai

James Kila i raitim

MINISTA bilong Konsavesen na Envaironmen na Membra bilong Unggai Bena, Benny Allan i laik stopim Hai Lou Laki pilai nau i wok long kamap bikpela tru insait long Isten Hailans Provins.

Mista Allan i tokim Wantok Niuspepa long wiken olsem em i no laik tru long dispela laki pilai ol i save kolim hai lo long stap long Goroka taun.

Dispela em bikos dispela laki gem i wok long mekim planti manmeri i les na i wok long ron i kam nating nating long taun.

Mista Allan i tokaut olsem em i luksave pinis olsem planti ol manmeri long ilektoret bilong em long Unggai Bena i wok long pulapim ol PMV na ron i go long Goroka taun long pilai hai lo.

"Planti ol lain husat i hat wok na kisim mani long wok kopi na long gaden kaikai i wok long go na lusim isi tasol long dispela laki pilai em hai lo," Mista Allan i tok.

Em i tok em i harim olsem dispela ol hai lo ples long Goroka i save pulap tru.

Mista Allan i nau yet i gat 10-pela ol ples long Goroka taun we sampela ol Esian bisnis man i kamapim we ol manmeri i save go bung na pilai.

Em i tok dispela laki gem i no gutpela na i wok long pinisim mani bilong ol manmeri isi tasol.

Em i tok olsem em

bai mekim wampela sabmisin long bung bilong Isten Hailans Provinsel Asembli long stopim dispela laki gem, hai lo long provins.

Mista Allan i wok long neks yia em i plenim bikpela program long kopi developmen long distrik bilong em we bai karamapim olgeta yut na ol manmeri.

Olsem na em i laik dispela laki pilai hai lo mas stop long operet insait long Isten Hailans Provins.

Mista Allan i askim olgeta politikel lida long provins long sapatim em na stopim dispela pilai, hai lo.

Em i tok tu olsem husat ol dispela bisnis man bilong Saina i wok long operetim dispela hai lo pilai i mas save olsem em i no gutpela invesmen na ol i mas stopim.

Mista Allan i tok tu olsem kain laki pilai i ken kamapim hevi long sait bilong mani insait long ol famili.

Narapela sait tu em planti ol yangpela manmeri husat lusim planti mani bai go insait long pamuk pasin na dispela i ken kamapim hevi long sik AIDS insait long komyuniti.

Nau yet planti ol manmeri bilong ples na ol setelmen long Goroka i save pulim lain strot long go pilai hai lo, em i tok.

Mista Alan i tok olsem planti manmeri i no save olsem ol i wok long lusim bikpela mani tru i go tasol long han bilong dispela ol Saina bisnis man.

Kot bilong man kikim meri indai bai kamap long Novemba

GOROKA Distrik Kot long las wik Mande i bin surikim taim long harim kot bilong wampela man Lufa long Isten Hailans Provins husat i kikim meri bilong em indai i go Fraide, Novemba 23.

Distrik Kot Majistret, Felix Terra i surikim taim bilong harim kot bilong wampela man, Phillip Singoro i go long Fraide long givim taim long ol polis prosekysen lain long redim ol fail o pepa.

Phillip Singoro i bin soim pes long kot haus long Goroka long las wik Mande taim Majistret Terra i surikim taim long komitol harim.

Mista Terra i tok dispela em wampela bikpela asua tru we bai i go long komitol

harim long skelim sapos dispela saspek em Singoro em Nesenel Kot bai harim keis bilong em o nogat.

Mista Terra i tok ol evidens em ol polis i givim na ol narapela witnes bai i skelim sapos dispeal keis bai go long nesenel kot.

Dispela saspek, Singoro bilong Duto viles long Lufa Distrik long Isten Hailans em i bin kikim meri bilong em 4-pela taim long het bilong em na meri i bin dai.

Dispela birua i bin kamap long Oktoba 20 long dispela yia long samting olsem 6 kilok long apinun.

Polis ripot i tok olsem Singoro i bin kikim meri bilong em, Esther Phillip bihain long

em i no bin kukim kaikai bilong em na redim i stap taim em i kamap long haus.

Mis Phillip i bin lusim laip bilong em na indai long 10 kilok long neks de.

Ol polis long Lufa i bin holim pasim Singoro na bringim em i go long Goroka Polis Stesin we ol polis man i bin askim em kwesten na lokim em long rum gat.

Long taim polis i bin askim Singoro em yet i tokaut olsem em kikim meri bilong em na kamapim indai bilong em.

Tasol taim polis i bin askim Singoro long givim ol stori bilong em, em i bin soim bikpela sori na i bin paul na i no klia tumas olsem husat tru bai lukautim tupela liklik pikinini bilong tupela. - James Kila

COME HOME TO CHRISTMAS AT COURTS

Home Entertainment

PHILIPS HTS6500
Home Theatre System

Fortnightly **K99**
Reg K2,119
CASH K1,799

PHILIPS HTS3548
Home Theatre System

Fortnightly **K115**
Reg K2,709
CASH K2,299

PHILIPS HTS6600
Home Theatre System

Fortnightly **K160**
Reg K4,359
CASH K3,699

PHILIPS HTS3105
Home Theatre System

Fortnightly **K52**
Reg K1,179
CASH K999

WAS K1,259
SAVE K260

COURTS

Kam HOME long Courts!

OPEN 7 DAYS A Week

PORT MORESBY BRANCH Spring Garden Rd., Gardens N.C.D.
Phone: 325 5900 • Fax: 325 4149
E-Mail: sales@courts.com.pg
MON-WED & FRI - OPEN 8:00AM - 5:00PM
THUR - 8:30AM - 5:00PM
SAT. 8:00AM - 1:00PM / SUN. 9:00AM - 1:00PM

OPEN 6 DAYS A Week

LAE BRANCH Milford Haven Road, Lae, Morobe Province
Phone: 472 4800 • Fax: 472 4621
E-Mail: courts_lae@courts.com.pg
MON-FRI - OPEN 8:00AM - 5:00PM
SAT - 8:00AM - 1:00PM / SUNDAY CLOSED

www.baha.com.pg
MEMBER

ING BUSINESS COALITION AGAINST HIV/AIDS

Hurry! Friday 30th

Offers End November, 2007

IMPORTANT: Courts Ready Finance is now available for you to apply! Call into our stores for more information on the terms & conditions. "Have anything in your home for just K1.00 DEPOSIT now!" is subject to Terms & Conditions. See in Store for details on this Lowest Deposit in PNG. Have "3 YEARS PEACE OF MIND" with Courts SuperShield; see our friendly staff to apply. Some items may not be available in other Courts store. "Prices" shown on the product(s) advertised here is subject to change at any one time without notice. We reserve the right to correct errors and misprints. Product(s) shown was available at the time of press printing. "Come Home to Christmas at Courts Promotion ends 30th November, 2007."

Konvensen long Rausim Olgeta

Olgeta stori bilong CEDAW insait long 10-pela Askim na Bekim

Namba wan hap (1) - Olgeta stori bilong CEDAW insait long 10-pela askim na bekim

1. CEDAW em i wanem? (kolim olsem 'si-do')

CEDAW em i sotpela nem bilong Konvensen long Eliminisen o rausim ilong olgeta kain Diskriminisen o birua agensim ol Meri. Em i wanpela Yunaitet Nesens intanesenel agrimen o wanbel long ol rait bilong ol meri.

Konvensen i tok klia long mining bilong diskriminisen agensim ol meri na ikwaliti o wankain rait bilong ol meri. Em i makim 12-pela bikpela hap bilong ol laip bilong ol meri we i nogat inap luksave i kam long gavman long stopim ol birua o pasin nogut agensim ol meri, olsem long sait bilong edukesen, marit na sanap o nem aninit long lo.

CEDAW i gat ol plen bilong eksen bilong ol kantri husat i sainim pinis, o i givim luksave long dispela Konvensen. Em i tok ol gavman i mas givim ol meri insait long ol kantri bilong ol wankain rait na sans olsem ol man i gat, dispela em i mas strong moa long ol ples we kalsa i strong moa yet long sindaun bilong ol manmeri.

2. Bilong wanem na ol meri i gat wanpela spesol konvensen bilong ol yet?

Intanesenel Bil ov Raits (IBOR) i givim planti rait na fridom bilong olgeta man na meri. Tasol tru tru, ol besik rait bilong ol turangu lain insait long komyuniti olsem ol meri na pikinini i nogat inap luksave yet olsem hap bilong humen raits.

I bin i gat luksave olsem i gat bikpela nid long ol arapela rot bilong lukautim na banisim ol humen raits bilong ol dispela grup. Ol meri, em luksave i bin kamap long wanpela Konvensen bilong ol yet i stap aninit long lo.

CEDAW i bin kamap long pulim ai bilong ol pipel long ol hevi we ol meri long wol i karim na long askim ol gavman long mekim wok long stopim pasin nogut agensim ol meri insait long ol dispela eria aninit long wanpela komitmen o tok promis i go long Konvensen.

Ol raits na fridom insait long CEDAW i kam long Intanesenel Bil ov Raits (IBOR), we em i "bikpela" toktok long humen raits we olgeta arapela konvensen, kavanen na deklaresen i kamap long en.

IBOR i luksave olsem ol besik humen raits em bilong olgeta man na meri bilong kain kain ples na lotu na em i mas stap olgeta taim. Dispela em i min olsem olgeta besik humen raits em bilong olgeta bikos olgeta em ol humen tasol.

IBOR em i gat tripela kain agrimen:

- Yunivesel Deklasesen bilong Humen Raits (UDHR)
- Intanesenel Kavanen long Sivil na Politikel Raits (ICCPR)
- Intanesenel Kavanen long Ekonomik, Sosol, na Kalsarel Raits (ICESCR)

3. Husat i bin raitim CEDAW na i bin longpela taim long raitim?

Konvensen em i kaikai bilong moa long tupela ten (20) krismas wok we Yunaitet Nesens Komisin long Stetus o sindaun bilong ol Meri (CSW) we ol i bin sanapim long 1946 long was long sindaun bilong ol meri long wol na long promotim o tok strongim ol humen raits bilong ol meri.

Wok bilong Komisin i halivim long kamautim planti hap we ol meri i no kisim wankain luksave olsem ol man. Olgeta dispela hat wok bilong strongim ol meri i kamapim sampela deklasesen na konvensen, we CEDAW em i namba wan bikpela toktok bilong en.

Ol mausman bilong moa long 30 UN memba kantri i wok insait long ol grup long raitim wanpela pepa long sanap bilong ol meri raunim wol. Klostu 66% bilong ol memba i bin ol meri na man i kam long developing wol - ol kantri wantaim ol ekonomia na gro bilong developmen we i wankain olsem ol Pasifik Ailan kantri.

Komisin i yusim Deklasesen long Rausim bilong olgeta kain wok Diskriminisen agensim ol meri, we ol i raitim long 1967, olsem bikpela astingting long mekim kamap wok. Em i lukluk long ol kain kain hap we i gat diskriminisen o daunim pasin agensim ol meri. (Bikos wanpela deklasesen i nogat strong long lo, na i no inap long givim ol komitmen o tok promis long ol kantri. Em i mas stap insait long wanpela strongpela intanesenel agrimen o tok wanbel olsem wanpela Konvensen).

Long 1979 UN Jenerel Asembli i bin karim laspela hap toktok bilong Konvensen na long mun Septemba 1981, bihain long ol i kisim olgeta tok orait bilong tupela ten kantri, Konvensen i bin kirap na i strong. Long wankain taim wanpela Komiti long Rausim bilong olgeta kain Pasin Nogut agensim ol Meri i bin kirap.

Long Februari 2001, 167 kantri i bin tok wanbel long karimaut CEDAW. Laspela kantri long givim tok oraitim bilong en em Mauritania.

4. CEDAW em i wanpela pepa bilong ol Westen kantri?

Nogat. Ol bikpela astingting insait long CEDAW i no kam long ol Westen kantri, wankain olsem ol pasin bilong bagarapim ol arapela i stap insait long en. Nogat wanpela samting insait long CEDAW em i nupela samting. Olgeta hap we CEDAW i karamapim em ol samting we ol meri long olgeta hap long wol i ken luksave long en. Ol astingting bilong ikwaliti o wankain luksave bilong ol man na meri insait long CEDAW i no narakain long ol dispela i stap insait long konstitusen o mama lo bilong mipela na mama lo bilong ol arapela Pasifik Ailan kantri. CEDAW i save tok klia o opim ol rait insait ong konstitusen bilong mipela i ken strong moa bilong helpim ol meri.

Wanpela astingting tasol bilong CEDAW we i kam long western kantri em lo tok-tok bilong em. Taim ol i tanim CEDAW i go long ol as ples tok ples, em bai isi moa bilong ol pipel long klia long en na givim luksave long en.

5. Sapos mipela i sainim CEDAW, bai mipela i mas senisim ol tumbuna pasin na kalsa bilong mipela?

Bekim bilong dispela askim em i isi. Nogat.

Ol tumbuna pasin em ol as bilong mipela insait long Pasifik. I gat planti samting insait long kalsa we i gutpela na i mas i stap na i mas i gat strongim. Long mekim mipela i lus tingting long ol o long wetim ol gavman long senisim olgeta kastom na tumbuna pasin bilong mipela bai daunim strong bilong Konvensen na wok bilong strongim ol humen rait bilong ol meri.

Atikel 5 (a) bilong CEDAW i tok ol kantri husat i sainim pinis i mas kirapim senis long ol pasin kalsa na tingting we i sindaun antap long tingting bilong daunim namba o strongim namba bilong ol man na meri o long ol kain kain tingting long wok bilong ol man na meri.

Dispela i min olsem taim wanpela kantri i givim luksave long CEDAW, gavman bilong dispela kantri i mas glasim gut olgeta pasin tumbuna na traim long senisim ol dispela pasin na tingting we i save bagarapim o daunim ol meri bikos ol em ol meri.

Olsem tasol, insait long planti kalsa, na insait long planti kalsa bilong Pasifik, ol i save lukim ol meri olsem ol i nogat ankain luksave olsem ol man na wok bilong ol insait long haus na famili i nogat luksave bilong ol tu. Planti meri em ol is ave ukim ol olsem samting bilong ol man bilong ol o bilong ol man insait long famili bilong ol, olsem na ol i save karim bikpela hevi we ol is ave bagarapim na paitim ol. Planti i no save gat sans long kisim gutpela skul insait long skonderi skul o yunivesiti, bikos planti man i save lukim wok bilong ol olsem long lukautim famili, maski ol i gat gutpela sans long mekim gut long skul o yunivesiti o i abrusim na i go moa yet. Olgeta rot bilong dispela kain tingting i sindaun long kalsa na pasin tumbuna.

CEDAW i luksave olsem maski ol meri i ken kisim wankain rait aninit long lo, i mas i gat wanpela arapela level bilong senis we i mas kamap. Dispela senis em senis long wok bilong olgeta de na long praiwet na pablik level. Dispela i mas i gat wanpela senis long pasin na tingting long wok bilong ol man na ol meri. Ol senis insait long lo yet bai no inap strongim ol humen rait bilong ol meri tasol em i ken sanap olsem namba wan wokabout long kamapim moa senis.

6. Husat i go pas long strongim ol rait bilong CEDAW?

Givim luksave long CEDAW em i wok bilong gavman. Ol gavman i mas go pas long strongim ol rait insait long CEDAW o wanem ol arapela konvensen we em yet i tok oraitim na givim luksave long en. Ol i mas sanapim ol rot we ol pipel husat i nogat gutpela luksave long raits bilong ol i ken bihainim sapos ol i kisim bagarap o karim hevi. Sampela long ol dispela kain rot em:

- Ol kot i jasim o skelim husat i ken givim gutpela na stretpela skelim
- Ol polis na pablik sevan husat i gat gutpela pasin na stretpela tingting
- Ol Mama Lo, ol lo na pablik polisi we i givim ol man na meri long wankain luksave
- Wanpela humen raits komisin

TINGIM: Ol gavman i no inap mekim olgeta samting olsem na wan wan manmeri tu i mas wok long skulim na traim senisim ol pasin bilong ol manmeri insait long komyuniti bilong ol.

7. Dispela tok 'ikwaliti' em wanem samting na CEDAW i save mekim wanem long strongim?

Taim CEDAW i toktok long ikwaliti bilong ol meri wankain olsem ol man em i no min olsem ol meri bai mas wankain olsem ol man. I gat ol samting long bodi namel long man na meri we i no wankain na dispela yumi mas luksave long en. Ol man na meri i save mekim narakain wok insait long komyuniti. Tasol CEDAW i tok dis-



Kalap kalap wantaim Digicel nau Krismas!



**Kisim FRI wanpela liklik
Boom Box taim yu baim
Digicel fon nau krismas!**

Digicel™

The Bigger, Better Network.

Terms and conditions apply. Offer applies to Prepaid & Postpaid customers and expires December 31, 2007 or while stocks last.

OL RIPOIT LONG INTANESANEL DE BILONG OL PIKININI WANTAIM VERONICA HATUTASI

Famili em bikpela samting long pikinini

GUTPELA sindaun bilong famili long taim bipo long tumbuna i wok long go nogut nau na klostu bai pundaun na bagarap olgeta. Dispela em toktok bilong Minista bilong Komyuniti Developmen Dame Carol Kidu long dispela wik long taim makim Intanesanel Yia bilong ol Pikinini insait long wol.

Long bipo taim, famili em bikpela samting tru bikos em i bun tru na strong tru bilong komyuniti we gutpela sindaun, rispek na pasin bilong helpim narapela narapela i save stap. Tasol nau dispela samting em wok long bruk bruk na lus isi

insait long komyuniti bilong yumi tude we i soim olsem Papua Niugini (PNG) nau em nupela PNG, Dame Kidu i tok.

Dame Kidu i tok long sampela ovasis kantri nau gavman bilong ol wok hat long traim bringim bek dispela strong na stail bilong famili i kam bek. Olsem na yumi long PNG tude em yumi mas holim strong dispela famili velyu o strong bilong famili na no ken lusim. Bikos dispela em i as bilong planti gutpela samting long laip na sindaun bilong yumi ol bikpela manmeri na bilong ol pikinini bilong mipela tu.

Long makim dispela Intanesanel De bilong ol Pikinini, Dame Kidu i tok olgeta papamama i gat dispela wok bilong stretim na kamapim gutpela sindaun bilong ol pikinini insait long dispela gutpela famili laip we ol tumbuna na papamama bilong yumi bin soim yumi.

Nau yumi no ken tok olsem pikinini em wok bilong mama long stretim na lukautim, nogat. Em wok bilong papa, ol kandre na bubu tu wantaim long lukautim na sevim gut ol pikinini bilong mipela long kamap gutpela manmeri bihain.

Dame Kidu i tok gavman i kamapim planti

gutpela wok long glasim na stretim ol Lo na rot bilong kamapim gutpela banis bilong lukautim na was long Raits bilong ol pikinini. Tasol planti taim dispela Lo i no wok gut bikos nogat inap mani bilong kari-maut wok bilong ol dispela Lo, wok i go bam wantaim ol arapela lain ejensi na tu ol papamama i no stap insait long mekim dispela Lo i wok.

Olsem na em i tok gavman bai lukluk moa long sait bilong givim sapot na moa helpim go long ol arapela lain ejensi o opis olsem ol non gavman ogenaiesen, sios na papamama long karimaut ol dispela wok na sapotim



HARIM GUT: Ol sumatin i harim gut toktok long autim bilong 'Yunaitet Nesens Ripoit long Vailens Agensim ol Pikinini' long wol, long Mosbi. Yunaitet Nesens (UN) mausmeri long Papua Niugini, Dokta Jacqui Badcock i bin tok nogat wanpela kantri long wol i bin tok em i nogat hevi long bagarapim ol pikinini. Na olgeta rijen long wol i luksave long ol rekomendesen we stadi ripoit i kamap wantaim.

POTO: NICKY BERNARD

gavman. Bikos ol dispela lain grup tu i save mekim planti wok bilong ol pikinini na komyuniti na ol i stap long gutpela rot na mak bilong helpim ol pikinini na famili hariap. Olsem na long dispela as gavman mas givim wok na sapot go long ol long mekim, em i tok.

Dame Kidu i tok tu olsem taim gavman i mekim dispela, em mas kamapim sampela moa strong o Lo we wanpela em ol kolim Intagretet Komyuniti Developmen Bil. Dispela em bilong givim moa moa sapot na tu givim wok go bek long han bilong komyuniti yet long go pas long lukautim ol program na

wok bilong strongim gutpela sindaun na amamas insait long laip bilong ol famili na pikinini. Dispela bai sapotim tru Lo bilong Lukautim Pikinini Ekt.

Em i tok komyuniti em bikpela samting bikos yumi olgeta i kamap long komyuniti we mama i karim yumi o em i graun bilong yumi na taim yumi dai bai yumi go bek long komyuniti bilong yumi long planim.

Taim gavman i mekim dispela em mas putim mani long baset bilong lukim ol dispela senis o polisi na Lo i wok insait long komyuniti bilong yumi.

Em i tok em bilip

olsem famili em bikpela samting PNG we em laik sapotim insait long komyuniti we ol ken lukautim ol planti pikinini husat wok long lusim papamama bilong ol long sik AIDS. I no gutpela wokim banis bilong lukautim. Ol mas stap insait na gro long komyuniti we famili i stap na was long ol.

Yumi olgeta mas pait strong na wok wantaim long kamapim gutpela sosaiti we i gutpela na fri long ol pikinini na famili bilong mipela bai stap insait long en. Na dispela bai kamap taim mipela olgeta i bungim strong, tingting na wok wantaim long kamapim, Dame Carol i tok.

Ol rait bilong ol pikinini em wok bilong olgeta lain

OL papamama na Gavman i gat bikpela wok long stretim gut ol Lo na ples bai ol pikinini ken sindaun gut insait na amamas long kisim gutpela laip.

Dispela em bikpela toktok olgeta gavman na olgeta manmeri save tok olgeta taim long yumi mas kamapim gutpela ples bilong ol pikinini i sindaun gut insait long en. Na yumi ol papamama i gat moa wok bilong kamapim dispela samting.

Dispela em sampela bikpela tok Deputi Siaman bilong Child Welfare, Gwen Tulo i bin mekim long dispela wok long bung bilong makim Intanesanel De bilong ol Pikinini.

Misis Tulo i tok taim ol papamama i kisim dispela salens long mekim kamap ol gutpela senis long laip na sindaun bilong mipela bai ol pikinini i stap gut long en, gavman tu i gat wok bilong sapim na stretim gut ol Lo bilong banisim na was long ol pikinini. Na ol dispela Lo i mas wok we yumi ken lukim kaikai bilong en.

Tasol Misis Tulo i tok em i wanbel olsem planti papamama i save mekim wok bilong ol long lukautim gut na kamapim gut ol pikinini bilong ol long ol kisim gutpela sindaun na amamas. Em i olsem ol pikinini i kisim na amamas long Raits bilong ol.

Tasol em i ting ol lain bilong kari-maut Lo bilong lukautim ol pikinini o

Raits bilong ol pikinini i mas mekim wok bilong ol moa. Rot bilong kari-maut ol dispela Lo na long lukim dispela Lo i wok i mas kamap ples klia wantaim papa na strong bilong en long banisim na sapotim ol pikinini long abrusim ol birua na hevi long laip bilong ol.

Em i givim salens tu olsem wok bilong lidasip long karimaut ol dispela wok bilong raits bilong ol pikinini i mas wok. Dispela lidasip i mas go pas long karimaut ol dispela hevi bilong yumi.

Dispela wok bilong gavman na papamama tu wantaim long bungim sapot na wok bung wantaim long kamapim dispela gutpela sindaun ol pikinini i laikim na ol i mas gat.

Misis Tulo i askim ol pikinini tu long givim bek dispela laikim na sapot bilong ol papamama go bek long ol. Sapos papamama i salim yu long brumim haus o wokim ti o sampela liklik wok bilong haus, yupela mas mekim. Givim bek dispela sapot go bek long papamama bilong yupela.

Long amamasim raits bilong yu olsem pikinini yu mas givim bek pasin bilong harim tok go bek long papamama bilong yupela, em i tok.

Tasol bikpela salens Misis Tulo i lusim wantaim ol pikinini em ol yet i mas tok nogat long ol samting bai bagarapim laip na sindaun bilong ol.



ADVERTISEMENT

SUBJECT: PROVINCIAL VISITS BY INVESTIGATIONS TEAM PROBING ALLEGATIONS OF CORRUPTION AT THE IMMIGRATION & CITIZENSHIP DIVISION OF THE DEPARTMENT OF FOREIGN AFFAIRS & FOREIGN EMPLOYMENT DIVISION OF THE DEPARTMENT OF LABOUR

The Investigations Team probing allegations of corrupt practices at the Immigration and Citizenship Division of the Department of Foreign Affairs and the Foreign Employment Division of the Department of Labour, has completed its investigations and interviews in Port Moresby with the relevant departments and stakeholders. It will now begin the provincial tours on Friday 23 of November 2007 in the West New Britain Province.

In the interest of the public and to ensure that stakeholders' views are canvassed fully, the Team's travel itinerary is hereby published.

The public is urged to take careful note of the dates the team will be in the different provinces.

DESTINATION	DATES	ARRIVAL
Kimbe-West New Britain	23/11/07 - 24/11/07	22/11/07
Lae - Morobe Province	25/11/07 - 27/11/07	24/11/07
Madang - Madang Province	28/11/07 - 30/11/07	27/11/07
Mt Hagen - Western Highlands Province	03/12/07 - 05/12/07	03/12/07
Daru - Western Province	06/12/07 - 08/12/07	06/12/07
Vanimo - Sandaun Province	12/12/07 - 14/12/07	12/12/07

The following members of the Team can be contacted on Mobile Phone numbers to arrange interviews while the Team is in the provinces.

Mr. Steven Raphael can be contacted on 694 4540 and Mr. Jimmy Ovia on 656 9865.

Steven Raphael
Chairman - Investigations Team

OL RIPOOT LONG INTANESENEL DE BILONG OL PIKININI WANTAIM VERONICA HATUTASI

Kamapim mekimsave lo long ol papamama

STRONGPELA askim i go long Gavman bilong PNG long mekim wanpela lo bilong givim mekimsave long ol papamama sapos pikinini bilong ol i wokim trabel long komyniti na sosaiti.

Dairekta bilong Komyuniti Polising, Kabib Lamu i wokim dispela toktok long wanpela bung tok-tok we i bin kamap long dispela Tunde long lonsim "Yunaitet Nesens Ripot long Vailens Agensim ol Pikinini" long wol.

Grup i bin sindaun na toktok long ol rait bilong ol pikinini na bagarap we famili na sosaiti i mekim long ol i bin gat long em Komyuniti Developmen Minista Dame Carol Kidu, Seketari Joseph Klapat, Yunaitet Nesens Developmen Program i makim tu maus bilong UNICEF, Dokta Jacqui Badcock, Dairekta bilong Save the Children ogenaisesen, Peter Raynes na tupela yangpela, Margarita Harao na Nos Weroa i makim maus bilong

ol pikinini bilong PNG.

Wanpela long ol toktok i bin kamap em, tru, ol papamama i gat wok long lukautim ol pikinini tasol ol pikinini i gat wok tu long sait bilong ol na i no long ting olsem ol bai stap long han bilong ol papamama olgeta taim.

Long skruim toktok bilong Mista Lamu, em i mekim bikos planti pikinini i raun nabaut long ol strit na taun na wokim trabel na i luk olsem ol i nogat papamama long givim stia long ol.

"Yumi kisim dispela hevi (long vailens o mekim nogut long ol pikinini) i go bek long famili. Mi laik tok olsem i moabeta long kamap wantaim wanpela lo bilong ol papamama long givim mekimsave i go long ol taim ol pikinini bilong ol i wokim trabel na i raun raun nabaut olsem ol i nogat ples na nogat papamama long lukautim ol na givim ol stia," Mista Lamu i tok.

Moa skul i mas kamap

MOA skul aweanes i mas kamap long ol pikinini i ken save long ol rait bilong ol na tu, askim i go long gavman na ol lo meka long strongim na lukim olsem kaikai i kamap long Aitikel namba 6 long UN Konvensen bilong Rait bilong ol Pikinini we PNG gavman i sainim pinis long en.

Leah Kelo em wanpela gret 8 sumatin meri long Hohola Demonstresen Skul insait long Nesenel Kapitel Distrik (NCD) i bin tok long Intenesenel de bilong ol Pikinini selebresen long dispela wik Tunde.

Taim Leah i toktok long nupela PNG we i stap insait long wol komyniti, em i tok stap bilong tude long PNG i hat tasol papamama i gat wok long lukautim ol pikinini

bilong ol.

"Mipela olsem ol pikinini i ken tok i no laik bilong mipela long kamap long dispela wol, ol papamama yet, tasol ating ol i no bin save long ol kain hevi ol bai bungim long laip i hat, o gutpela o nogat?"

"Na sapos ol papamama i sot long mani na bungim hevi long putim kaikai long famili, haus long stap long em, sevis long go long haus sik na skul, bai laip i hat long mipela tu taim ol pikinini long ol narapela kantri i stap amamas.

"Olsem em i gutpela long ol pikinini i save long ol rait bilong ol bikos sapos nogat, ol bikpela marmeri bai go het long mekim nogut long ol," Leah i tok.

Post PNG

Salim moni
Kwik Long
dispela **Krismas**

SALIM MONI KWIK

SALIM MONI KWIK
wokim isi long salim na kisim moni long olgeta hap Post PNG opis i stap.

- ✓ Isi
- ✓ Hariap
- ✓ Gutpela
- ✓ Noken baim moa

Call our Toll free Tel: 180 2999
Post PNG Customer Care P.O. Box 2 Boroko NCD
Email: customercare@postpng.com.pg

Post PNG

TOYOTA HILUX

Trusted Quality

- ✓ TOUGH
- ✓ RELIABLE
- ✓ DURABLE
- ✓ HIGH RESALE VALUE

4x4 TURBO

Limited Stock for Limited Time only!
(Hilux D/Cab 4x4 B1 model)

WIN A HILUX
this Christmas

Buy Now and give yourself a chance to...

TOYOTA
Making wishes come true this Christmas

Ela Motors TOYOTA
Your First Choice

FOR MORE INFORMATION CONTACT YOUR FIRST CHOICE BRANCH TODAY

Hurry While Stock Lasts!

Port Moresby..Ph 3229400	Kimbe....Ph 9835155	Wewak..Ph 8562255
Lae.....Ph 4781800	Lihir.....Ph 9864099	Vanimo..Ph 8571254
Kokopo.....Ph 9829100	Buka.....Ph 9739915	Tabubil..Ph 5489060
Madang.....Ph 8522188	Goroka..Ph 7321844	Porgera..Ph 5479367
Mt. Hagen....Ph 5421888	Kavieng..Ph 9842788	Alotau...Ph 6410100

Conditions Apply . www.elamotors.com.pg . Offer Expires : 10 / 12 / 2007.

GLASIM TOK

wantaim

FR LOLLINGTON WIAM



Ol giaman we i save wok

WANPELA taim long bipo yet, 4-pela dimon o spirit nogut i bin bung long wanpela ba o ples bilong dring. Bihain long ol i dringim tripela bia tasol, ol i stat long tok kros namel long ol yet. Wanem em namba wan tok giaman long tokim pipel long en? Olgeta i gat ol narakain tingting long givim long dispela.

"Tokim ol olsem i nogat God," yangpela tru long ol dimon i tok.

"Noken wokim ol longlong toktok," fatpela brata bilong em i tok. "Ol i no longlong long harim dispela kain toktok. Ol bai lukluk long ol ples ol i stap long en na save olsem i gat God. Ol saientis i bin kam long we?"

"Wet, mi save," bun nating dimon i tok. "Tokim ol olsem i nogat pasin bilong pogiv."

"Nogat, dispela em i longlong moa," pulap long planti save dimon i tok. "God i pogivim ol planti taim pinis na tu, ol pipel ol i stap wantaim. Olgeta win ol i pulim long stap laip i min olsem God i stap wantaim ol. Ol bai ino inap bilipim dispela."

"Olsem wanem long evil o tudak pasin?" yangpela dimon stret i tok gen. "Sapos yumi tokim ol olsem i nogat samting olsem tudak pasin, ol bai i no inap redi long yumi taim yumi kam."

"Dispela em gutpela tingting," brata bilong em i tok, "tasol tru ol i ken tingting i sot, ol i ken lukim ol samting i no gutpela pipel i wokim long wanpela narapela, ol woa, wokim nogut long wanpela narapela na i no bisi long wanpela narapela. Nogat, ol i no inap bilipim. Ol i no apas."

Bikpela bilong ol dimon i no bin wokim wanpela toktok inap nau. Tasol nau, em i putim bia bilong em i go daun na rabim maus bilong em wantaim han bilong siot na toktok long namba wan taim. "Tokim pipel olsem i nogat God, i nogat pasin bilong pogiv o i nogat tudak pasin long pret long em i gutpela. Tasol i gat gutpela wan i stap. Wanpela we bai kisim ol olgeta taim...."


"Wanem dispela," olgeta i singaut, "Tokim mipela?"

"Tokim ol olsem noken hariap," Satan i tok. "Ol save bilipim dispela olgeta taim."

Lukim, em i tru. Yumi save i gat ol samting we mipela i ken mekim/lusim ol pasin nogut, noken wokim ol olpela sin, brukim prenpasin long stretim gen, wokim preia na pogivim ol pipel mipela i gat asua long ol. Noken tok olsem mi mas noken hariap. Stretim laip bilong yu nau.

Giaman pasin yumi save tokim yumi yet em i nogut tru winim ol giaman we ol narapela i tokim yumi long em.

Gavman mas mekim PNG olsem famili



BISOP CHERUBIM: Givim luksave long PNG olsem famili.

...Lukautim gut ol meri na pikinini

Veronica Hatutasi i raitim

ASKIM i go long Praim Minista Gren Sif, Sir Michael Somare na gavman bilong em long lukim na mekim Papua Niugini (PNG) kamap olsem wanpela bikpela famili.

Oksileri Bisop bilong Pot Mosbi Katolik Asdaiosis na Deputi Bisop bilong Caritas, Bisop Cherubim Dambui i mekim dispela askim long kirap bilong Sosel Jastis Program long Mosbi long las wik Fraide we samting olsem 100 skol pikinini, ol bikman bilong Caritas PNG, na lain i makim sosel welfea, na edukesen i bin stap long en.

"Sapos i nogat dispela luksave long kantri olsem famili, bai yumi go het na

bungim ol kain hevi yet," Bisop Cherubim i tok.

Em i tok ol plen na tingting ol gavman, sios lida na papamama i gat i mas kraim kaikai.

Het tok bilong kirap bilong program na Sosel Jastis Sande em "Larim ol pikinini i kam long Mi."

Asbisop John Ribat bilong Pot Mosbi Asdaiosis long toktok bilong em i bilip olsem tok hait long dispela het tok em Jisas i wok long tok long bihain taim i bilong ol pikinini.

Asbisop Ribat i askim bai yumi mekim wanem long helpim redim ol pikinini long lukluk long bihain taim wantaim amamas olsem gutpela samting i stap long bihain taim?

UC Yut na Pikinini Ministri kisim gutpela sapot

Veronica Hatutasi i raitim

GUTPELA sapot na helpim mani i wok long kamap nau long ol sios yut na pikinini program na prosek, Yut na Pikinini Ministri Kodineta insait long Yunaitet Sios Asembli, Leonard Sabadi i tok.

Em i tok olsem insait long tripela yia em i go pas long ministri em i lukim olsem gavman, ol non gavman ogenaiesen (NGO) na ol dona ejensi i givim bikpela lukluk na mani sapot long ministri.

Dispela i narakain long bipo we dispela mani helpim i no bin stap tumas.


Em i tok AusAID (helpim han bilong Australia Gavman husat i save wok long ol narapela kantri) aninit long Sios Patnasip Program (CPP) na ol arapela dona ejensi nau i wok wantaim ol sios long karimaut na strongim ol yut na pikinini program bikos dispela i

helpim ol yut long kamap ol gutpela manmeri long famili, komyniti na kantri na long wankain taim tu, helpim long daunim ol lo na oda hevi.

Mista Sabadi i tok wanpela samting we ministri bilong em i laik mekim em long kirapim na strongim wok bilong Bois na Gels Brigets na ministri bilong em klostu taim bai holim wanpela bikpela bung long Mosbi long dispela.

Bikos long planti sosel na famili hevi i kamap tude i karamapim ol yangpela, Mista Sabadi i tok sios i bai lukluk long stretim ol dispela hevi aninit long ministri bilong em wantaim edukesen ministri bilong sios.

Em i tok ministri i sapotim ol yangpela pipel long kamap papa bilong ol prosek na program.



LEONARD SABADI: U/C Yut Ministri Kodineta

Luteran Siassi Distrik bung go gut

Paulus Tali i raitim

OL Luteran Sios bilip manmeri long Siassi Ailan, Morobe Provins i kisim askim long wok bung wantaim na kamapim gutpela senis.

Pastaim Presiden bilong Luteran Sios Siassi Distrik, Micah Yalamu, i wokim dispela askim long namba 23 Distrik Yut Konpens o bung bilong ol las wik. Moa long 450 Luteran Kristen bilong 15 peris long Siassi i bin kamap long wanpela wik bung ol i bin holim long ples Kampalap long Mabey Peris.

Wantaim het tok bilong bung, "Yumi Kristen i mas Sanap long Bilip na Mekim Wok", ol i bin toktok moa long wok misinari bilong sios insait long Siassi Distrik i mas ron gut. Na ol i bin autim olsem planti wokman olsem ol pasto na evanjelis i gat hevi long wok sait bilong ol.

Long wankain taim, 4-pela nupela pasto i bin kisim blessing long mekim wok bilong ol. Em long Emmanuel Som Yalamu bilong Yangla Peris, Jonathan Ase Roland bilong Nuru Peris, Samuel Wanduro bilong Padamot Peris na Moses Joel bilong Semo Peris.

SKRUIM

WOK: Luteran sios Pasto Barry Kingsway na meri bilong em Alice, long gutbai bung. Tupela bai wok misinari long Kep Yok Peninsula, Australia bihain ol i wok long Luteran sios long Madang planti yia.





Goroka Grama sumatin skul long kopi

James Kila i raitim

KOPI em wanpela bikpela agrikalsa kes krop long Papua Niugini (PNG) we i save bringim moa long K400 milien i kam insait long ikonomi bilong kantri olgeta yia.

Moa long 2.5 milien pipel long PNG em sindaun na laip bilong ol i kamap orait long ol ples na hauslain long kopi tasol.

Taim ol i salim kopi ol i save kisim mani na baim klos, kaikai, skul fi, baim meri na tu peim kompensesen.

Dispela em sampela ol toktok em ol opisa bilong Kopi Industri Koporesen (CIC) i bin givim long ol sumatin bilong Goroka Grama Skul taim ol i bin mekim lukluk raun o ekskesen bilong ol i go long CIC hetkwata long Goroka, Isten Hailans Provins.

Ol dispela sumatin husat i bin mekim lukluk raun i go long CIC em ol memba bilong "Ekskesen Klab" bilong Goroka Grama Skul. Tupela ten tu sumatin stat long gret siks i go gret 12 i

memba bilong dispela skul klab.

Tisa husat i go pas long dispela program, Sinaboi Tonny i tokim Wantok Niuspepa olsem bikpela as tingting long kamapim ol ekskesen bilong ol sumatin em long soim ol wanem ol samting i save kamap long ples tru bilong wok insait long bisnis o gavman dipatmen.

"Mipela laik opim tingting bilong ol sumatin long ol i ken save long wanem ol spesolis eria ol wok manmeri i save wok. Dispela i ken helpim ol tu long taim ol i pinis skul na laik filim ol aplikesen fom long kisim wanem ol treid, ol i bai save olsem i gat ol kainkain spesolais fil i stap," Mista Tonny i tok.

Em i tok tu olsem long ol ekskesen ol sumatin bai gat sans long askim kwesten na save moa long wanem wok ol spesolais wok manmeri i save mekim.

Mista Tonny i tok ol i bin statim program bilong ekskesen klab long tem 3 long namel bilong dispela yia na sampela ol

ples o ogenaisesen ol i raun na lukim pinis em NBC, PNG Paia sevis, na PNG Institut of Medikel Risets (PNG IMR).

Long lukluk raun bilong ol long CIC Hetkwata ol i bin bungim Jeneral Menesa bilong CIC, Industri Oporesen Divisin, Elison Pidik na Pablik Rilesen Opisa, Tebi Naged husat i bin givim ol stori bilong CIC na kopi industri long kantri.

Mista Pidik i bin stori long ol sumatin long wok kopi industri i save mekim long PNG ikonomi na wanem ol kantri long wok i save go het yet long baim PNG kopi.

Em i tokim ol tu long ol kainkain gret bilong kopi stat long seri, pasmen na ol grin bin kopi.

Mista Naged i bin karim ol sumatin i go raun na soim ol sampela lo ol wokmanmeri i save bihainim taim ol i go wok olsem klok in long taim kad, ol opisa bilong ol divisin na ol akauns opis.

Utu Hai Skul bai kisim gret 11 neks yia

OL sumatin long Nu Ailan Provins i gat moa spes long provins yet long skruim edukesen bilong ol i go long gret 11 na 12.

Dispela i kamap bihain long Utu Hai Skul i stap klostu long Kavieng taunbai kamap sekonderi skul neks yia na kisim ol namba wan gret 11 sumatin.

Nu Ailan Gavana, Sir Julius Chan, i bin tokaut long dispela taim em i mekim klia long K700,000 we Nu Ailan Provins Gavman i bin katim long Manggai Hai Skul em ol i tanim na givim long Utu bilong karimaut ol wok stretim, sanapim sampela moa skul bilding na mekim tu ol wok long stretim ol bilding bilong redi long Utu Hai long kamap sekonderi skul neks yia.

Utu bai kamap olsem namba tu

sekonderi skul long Nu Ailan Provins bihainim Namatanai Sekonderi.

Sir Julius i tok long wanpela bung ol bin holim ol i kolim long "100 De Samit", planti sumatin long Nu Ailan i no stap long skul bikos i nogat sans long planti bilong ol i skruim skul bilong ol i go long sekonderi level.

Tasol em i tok dispela bai senis long wanem ol bai apgetim pastaim Utu Hai Skul na bihain Manggai Hai Skul i kamap ol sekonderi skul. Na bihain, ol bai apgetim Mongop hai skul i go long teknikel kolis long yia 2010.

Sir Julius i tok moa sumatin long Nu Ailan bai skruim edukesen bilong ol i go long gret 11 na 12 na yusim nupela edukesen polisi bilong gavman we i helpim long peim 75 pe sen edukesen subsidi.

Kerowagi meri i mas long tok nogat long gan

"Gan i save kamapim wanem kain gutpela sindaun long ples. Gan i mas pinis long Kerowagi. Yu papa mama bilong gan yu save tingim yu yet na yu save tingim mipela ol mama na pikinini tu? Plis yu gat gan, lusim long han bilong polis. Gan kamapim birua na pret."

Dispela ol tok i stap antap long palang na laplap. Trabel na gan fri mas kamap long Kerowagi distrik insait long Simbu provins long las wik Fraide.

Moa long 1000 meri long Kerowagi Distrik i kamap long dispela bung we i kamap long Kerowagi stesin.

Meri loya na huma raits loya we i

save helpim ol meri na pikinini em Paulin Kenna i tokim Wantok Niuspepa long Kerowagi olsem, "Ol dispela welkam long olgeta hap bilong Kerowagi Distrik long tupela LLG we i gat bikpela pait i bin kamap long las min na i gat bikpela bagarap na planti man i bin dai. Dispela em long ples Bokokawa long apa Koronigle lokal level gavman."

Misis Kena i tok olsem dispela tingting na as bilong dispela mas na kempen em long stopim pasin bilong i gat gan na pait tumas na ples i stap long pret na planti samting i bagarap i wok long kamap long ples na meri pikinini insait long Kerowagi.

PNG yangpela skul long Humen Raits na Diplomesi

Veronica Hatutasi i raitim

TUPELA yangpela Papua Niugini pipel i go long tripela wik skul long Wellington bilong kisim trening skul long Humen Raits Pipel Diplomesi trening program.

David Ephraim em wanpela yangpela man husat i save promotim humen raits na mekim wok advokasi long ol yangpela pipel long PNG wantaim Serah Kende husat i save wok wantaim PNG Komyuniti Inisiativ wanpela NGO we Oil Ses (Oil Search) i sponsaim.

Woksop skul em samting olsem 30 manmeri i save wok long Humen Raits Diplomesi eria bilong Esia, Pasifik na lain i makim ol asples lain long Australia em ol Aborijinis i sindaun long em.

David, Serah na nara-pela bilong Fiji em tripela yangpela lain



HUMEN RAITS SKUL: David Ephraim na Serah Kende i sanap wantaim Gavana Jeneral bilong Nu Silan, Honorebol Anand Satyanand, PCNZM, QSO long welkam brekfas.

tasol i makim Pasifik rijen.

Yunivesiti bilong Nu Saut Wels fakalti bilong lo wantaim Amnesti Intenesenel Nu Silan na Nu Silan Kaunsil bilong Intanesenel i sponsaim

dispela trening woksop long Wellington, Nu Silan.

As tingting long holim dispela trening em long strongim ol lain i wok long sait bilong lukautim humen rait long kari-

maut gut wok insait long ol komyuniti long rijen bilong ol.

Ol eria we ol i kisim skul long kainkain samting long Humen Raits.

Whatever your education or work experience, CIC has Training for YOU

TRAIN FOR SUCCESS IN 2007!

Gain accredited awards and skills to secure a good job, high pay, security, respect. CIC Training includes easy-to-master Study Materials, expert Guidance, Tests & Model Answers, Exams, Award, Registered Despatch, CIC Members' website.

International Diplomas (£170 or US\$350)

- *Accounting, Hotels, Travel & Tourism, Computers & IT, Economics
- *Sales & Marketing, Global Marketing, Advertising, Public Relations
- *Business, Management, Human Resource/Personnel, Administration
- *Insurance, Secretary, Purchasing, Project Management, Banking
- *Leadership, Employee Development, Business Start-Up, Strategy
- *Business English, Office, Communication, International Business
- *Advanced Management, Organisational Behaviour, Stores & Stock

BA Programmes: BBA, BFA, BMA, BCom, BA Eng, MBA

- *Business, Finance, Human Resources, Marketing, English
- *Commerce, Administration, Organization, Development

Write, fax or email for a FREE Prospectus to:
CAMBRIDGE INTERNATIONAL COLLEGE
 PO Box 1378, Southampton, SO17 3WX, Britain
 website: www.cambridgecollege.co.uk
 email: info@cambridgetraining.com Fax: 00 44 1534 485071

Papua New Guinea National Training Council Approved Training Provider

British Learning

ODLQC ACCREDITED

ASET ACCREDITED AWARD



TELIKOM PNG LIMITED
"our communication company"

"B" Mobile Post-Paid

International Roaming

NOW YOU CAN ROAM IN AUSTRALIA USING "B" MOBILE POST-PAID SERVICE to:

- SMS to PNG.
- Call from Australia to Rest of the World.

**COMING SOON ARE FOLLOWING COUNTRIES;
South Korea, Singapore and Malaysia.**

**LOOK OUT IN THE PAPERS
for other countries...**

Be free. Roam the world.

ANOTHER REASON WHY YOU SHOULD STICK WITH TELIKOM PNG

Always there!






TELIKOM PNG LIMITED
"our communication company"

Start-Up kit discount

"Telikom PNG makes my communication needs easy and simple"



K20

DON'T LIMIT YOUR CALLS. CHANGE YOUR SIM WITH THIS BEST OFFER & GET CONNECTED WITH EVERYONE

START-UP KIT

WITH K15 FREE CALL CREDITS

now that's real communication

Always there!





YUMI na HIV wantaim



Fr Jude Ronayne Forde OFM

Kristen Kantri

Dispela wik tok i kamap long niuspepa olsem sampela man i gat tingting long kilim Praitim Minista bilong yumi.

Komisina bilong Polis i tok dispela samting i no inap kamap long Kristen kantri. Tingting bilong em i olsem, PNG em wanpela Kristen kantri na ol man i mas bihainim lo bilong God. Na wanpela bikipela lo bilong God i olsem: "Noken kilim man indai."

Mi ritim dispela stori na mi bin tingting: Sapos ol PNG i bihainim stret lo bilong God bai i nogat bikipela wari tru long sik AIDS.

Bai ol manmeri i was gut bai ol i no givim HIV binatang long narapela. Na husat, ol tarangu i sik pinis long HIV, bai yumi olgeta i sori long ol i lukautim ol gut. Tasol, ating nogat olsem. HIV i wok long kamap bikipela na pasin bilong lukautim sik manmeri i slek olgeta!

Ol niuspepa, long mun Oktoba na Novemba, i pulap tru long kainkain stori long man i paitim man, bagarapim meri, na kilim man na meri indai. PNG em wanpela "violent" kantri nau o pait ples. Yumi olgeta i bin kisim hevi long "violence". Tripela taim ol raskol i bin hansapim mi yet.

Man i save toktok na stretim tok pastaim. Em as bilong ol bung, kibung na kot. I tru wan wan man o meri i gat tingting na laik. Tasol, yumi i mas harim toktok o wari bilong narapela pastaim na traime long stretim tok. Tasol, rot bilong paitim man, tromoi han, katim man long naip na givim baksait long man i no Kristen pasin.

Long ministri bilong HIV/AIDS, harim tok na wari bilong sikman na lain bilong em em i bikipela samting tru. Tasol, planti i save les long harim wari bilong sik manmeri. Bekim bilong sampela i no gutpela tumas. Olsem na, planti ol toktok nogut, rausim sikman long haus na les long helpim sik manmeri i save kamap.

Yumi ken tok long maus: "Mi Kristen!" Tasol bai man i save yumi Kristen o nogat long pasin yumi mekim. Yu ken kilim man indai long gan o naip samting. Tasol, tu yu ken kilim man indai long toktok nogut long em, long givim baksait long em, long les long givim marasin o kaikai long em.

Kristen pasin em pasin bilong pogiv, sori na marimari long narapela. Jisas i tok strong olsem: "Olgeta samting yupela i bin mekim long wanpela brata bilong mi hia i nogat nem liklik, ol dispela samting yupela i bin mekim long mi." (Mt 25:40) I olsem, yumi ken mekim gutpela Kristen pasin o pasin nogut.

Melanisen Faundesesen helpim skruim helt sevis

Veronica Hatutasi i raitim

WANPELA Non Gavman Ogenaisesen (NGO) insait long Madang Provins i wok long helpim kisim ol helt na edukesen sevis i go long ol rurel eria o ples.

Bikipela tingting bilong em nau em long karimaut ol wok stretim long ol rurel helt senta na etpos na ol i ron long helpim ol pipel long.

Melanisen Faundesesen (MF) em dispela NGO ogenaisesen we i wok long helpim lukim ol helt senta na etpos insait long ol rurel eria long Madang Provins i gat ol samting i stap stret, wok na ron gut na pipel i kisim sevis. Na tu, ol rurel skul tu long Madang na Is Sepik.

Insait long 4-pela distrik long Madang provins, i gat 129 etpos. Long dispela mak, 65 i stap pas na 64 i stap op.

Siaman bilong MF, Sir Peter Barter i tok i Faundesesen i helpim karimaut ol wok stretim long Miak Helt Senta na Gaubin Lutheran Sios haus sik long Karkar Ailan na Josephstaal helt senta tu.

Sir Peter i tok ol wok long stretim na karimaut ol wok stretim i ron gut long wanem faundesesen nau i kisim Peter Memafu olsem ful taim Dairekta na wanpela man



OL FAUNDESEN WOKLAIN: Liklik woklain grup bilong MF em Dairekta Peter Memafu (wantaim aiglas), Mumpain Iloi em Seketari na llektrisen, David Amat long opis bilong ol. Foto: Veronica Hatutasi

husat i helpim em long menesim na go hetim olgeta prosek bilong faundesesen.

Em i tok bipo long Faundesesen i go insait long wok stretim, planti ol wod long Miak helt senta i bin pas bikos long wara i sot hevi na i bin gat nid long stretim planti ol samting long helt senta.

Sir Peter i tok 32 etpos i kam aninit long Miak Helt senta na

sapos em i pas, ol sevis em i givim long ol dispela etpos bai pas na pipel i kisim taim long en.

Sir Peter i tok olsem wanpela NGO i no save wokim winmani tasol i rejista pinis, MF i go insait long sampela bikipela helt prosek wantaim ol sios, NGO na gavman.

Wanpela long ol em taim nevi sip bilong Amerika i bin go long

Madang na karimaut ol helpim givim helt sevis i go long Josephstaal na Miak na Gaubin helt senta na ol pipel long ol ol eria na Madang provins.

Taim sip i lusim Madang, Faundesesen i bin skruim ol wok na nau em i go het mekim dispela wok.

Sir Peter i tok tasim Faundesesen i pinisim ol wok prosek long ol dispela helt senta, em bai statim wok long bildim wanpela helt senta na Voluntia-Kaunseling na-Testing (VCT) senta long Basamuk we nupela Ramu Nikel prosek i stap long em.

Faundesesen bai helpim kirapim tu wanpela helt senta long Kranget Ailan na ol arapela helt prosek long ol rurel eria bilong Madang Provins.

Long wankain taim, Bot bilong Gaubin Haus Sik i makim tu ol pipel bilong Karkar Ailan i autim bikipela tok tenkyu i go long Sir Peter long helpim kamapim ol senis na wok mentenens long Gaubin.

"Haus sik em yet i nogat inap mani long kamapim ol senis na mipela olsem bot i autim bikipela tok tenkyu i go long yu Sir Peter long ol wok helpim yu givim i kam inap nau," Gaubin Haus Sik Siaman, Mailong Labong i tok.

DWU woklain na sumatin kisim fri ai tes

OL LAIN i kisim diploma kos bilong lukautim ai long Divain Wod Yunivesiti (Divine Word University o DWU) long Madang i bin laki long dispela wik long kisim fri ai tes.

Dispela i kamap taim Fred Holos Faundesesen (FHF) em intanesenel speselis long lukautim ai i go long DWU we ol sumatin i skul long Fleksibel Lening i skul i stap.

Antap long speselais long lukautim ai, FHF i save givim trening na skul long givim save long ol samting i sut long ai.

Na Faundesesen i wok long helpim ai skul long DWU long skulim ol sumatin long dispela eria.

Planti sumatin, ol leksara o tisa na woklain i bin kirap nogut long raun bilong FHF lain i go kamap long

kempus tasol ol i bin gat dispela sans long sekim ai bilong ol fri.

Kos long lukautim ai em i nupela kos long DWU we ol i kirapim tasol long dispela yia.

Olsem na ol sumatin i bin kisim dispela olsem sans long kisim moa save na ekspiens long helpim karimaut ai tes.

Ol nes long olgeta hap bilong kantri i go sindaun long ai kos we DWU i poroman wantaim FHF na Modilon Provinsel Haus Sik long karimaut ai skul.

Namba wan grup bilong ol nes i kisim ai skul kos bai greduet bihain long tupela yia bihain long 2009.

Ol nupela Wabag haus sik woklain i greduet

OL NUPELA pablik sevan i greduet las wik long wanpela kos long Wabag Jeneral Haus Sik i kisim strongpela toktok long mekim gut wok bilong ol.

Samting olsem 112 manmeri i wok long Wabag Jeneral Haus Sik long Enga Provins i bin sindaun long tupela wik kos long kisim save long wok bilong ol olsem ol pablik sevan.

Dispela em i namba wan taim kain kos i kamap long haus sik na kantri.

Ektim Sif Eksekutiv bilong haus sik, Peter Pindan taim em i tokim ol nupela greduet i tok olsem dispela em i stat long nupela wokabout bilong ol olsem ol ful taim pablik sevan.

"Yupela i laki long go insait long pablik sevis tasol yupela i mas soim olsem yupela i ken mekim gut wok," em i tok.

Olgeta samting long lukautim yu long taim bilong Spots...

Wholesale Spring Garden Rd Gordons Ph: 325 3356 Fax: 325 0190 Email: sales@johnstone.com.pg

Boroko P.O. Box 1086 Boroko Tabari Pl. Ph: 325 5338 Fax: 325 6411

Port Moresby P.O. Box 146 Pt Moresby Bumaus Haus Champion Pd Ph: 321 4424

Pasin paitim meri

Dia Edita,
Inap long yu givim mi liklik spes tasol long autim hevi bilong mi.
Planti taim mi lukim long niuspepa na harim long redio na lukim long TV long dispela vailens agensim ol mama o meri long olgeta taim.

Long lukluk bilong mi, mi lukim planti ol meri i no sindaun gut wantaim famili o i stap gut wantaim man bilong ol.

Ol i save raun i go long ol klab na painim man na slip wantaim ol. Na long las wik i go pinis mi lukim long Pos Kororia olsem wanpela meri i kapsaitim kerosin

antap long em na laitim paia antap long em yet.

Em i wanem kain sain o pasin? Yupela ol man mas i stap isi na noken paitim ol meri nating na tu yupela ol meri mas noken raun raun painim mani o painim man. Yupela yet tu i save kamapim hevi long yupela yet long komyniti bilong yu.

Planti ol man i no inap long paitim meri bilong ol. Sampela meri i save mekim pasin nogut long ol man bilong ol na ol i save kisim mekimsave long ol man bilong ol.

W WANGS
KIMBE

Helpim ol lain long Oro i kisim bagarap

Dia Edita,
Mi bel sori long ol lain bilong yumi long Popondetta long wanem hevi ol i go insait long en nau.

Ol nius i toktok long ol man i bungim bikpela hevi pinis na planti moa man i wok long dai long hangre na planti man i stap painim haus long abrus long dispela birua.

Plis gavman, hariap na salim helpim i go long ol tarangu lain bilong yumi. Em i sori long harim olsem ol

givim mani long ol kain samting olsem spot na i no long ol lain husat i nidim tru helpim.

Mi bel sori stret long ol na mi no save tru long mekim wanem tasol long beten long God papa long dispela taim long hevi.

Plis ol pipol long PNG, kam bung wantaim na salim helpim long ol pipol long Oro.

SORE PES
PIENGI

Gavman i mas helpim long daunim sik AIDS

Dia Edita,

Mi wanpela IT kompyuta sumatin long Aitape. Mi ritim planti niuspepa, lukim EMTV na planti awenes bilong dispela bikpela sik insait long kantri bilong yumi Papua Niugini (PNG), em sik HIV na


AIDS.

Olsem na mi raitim dispela pas i go long gavman long askim mipela bai olsem wanem long dispela sik AIDS? Planti manmeri i gat dispela sik na planti bilong ol i dai pinis.

Na mi laik bai ol gavman skelim dispela tingting bilong mi inap long mekim tes bilong blut long olgeta manmeri long kantri na husat manmeri i kisim sik i mas i stap longwe long olgeta pipel tasol gavman bai lukautim ol yet.

Plis inap yupela bekim dispela pas o putim long TV bikos Aitape nogat balus long ol pepa i ken autim tasol i gat TV long mipela i ken lukim.

RITA YESSU
AITAPE



MALOLO: Sampela pikinini i malolo anit long wanpela traipela sain bot bilong telepon kampani Dijisel antap long Poreporena Friwe long Mosbi, Nesenel Kapitel Distrik, pastaim long ol i wokabout na kalapim maunten i go long narapela sait.

Ol man i laik rausim PM

Dia Edita,
Mi wanpela man bilong ples na mi laik autim tingting bilong mi long Wantok Niuspepa na ol arapela pipel long PNG i ken ritim. Ating sam-pela pipel long kantri i gat wankain luksave tu.

Dispela tupela politisen, Sir Mekere Morauta na Bart Philemon long taim bilong Nesenel Ileksen 2007, tupela i bin tokaut long kamapim woa long rausim Gren Sif Sir Michael Somare long taim bilong kempen bilong tupela long olgeta hap bilong kantri.

Tupela i bin pasim

tok na haiarim ol sopa long flai long ol ruel eria long strongim kempen bilong ol long rausim Sir Michael.

Sori tru long tokaut olsem, dispela tok bilong tupela i no wok na i popaia. Tupela i no winim dispela sia na hamas tausen kina i lus nating long mekim dispela wok.

Na nau tupela i stap long Oposisi na i wok long wok hat tru long rausim Sir Michael long dispela hevi bilong Moti.

Sori tru. Ating bai yu tupela i mas traim ken long 2012 ileksen.

PS WALA
WEWAK

Pasin Kristen bilong yumi pipel i mas stap strong

Dia Edita,
Mi laik toktok long wok bilong ol pasto na ol Kristen manmeri. Em i gutpela wok ol i wok long mekim long autim tok bilong Bikpela na tok save long yumi olsem Heven em i stap ril na hel tu wantaim.

Tok ol i save autim long Baibel i tru long wanem mi laik saye moa long ol wok bilong ol. Planti kainkain lotu i kamap pinis. Planti ol giman pris o man ol i kolim ol yet wok manmeri bilong God i raun long ol strit long autim tok bilong God. Em i luk olsem long ol tok bilong Baibel i wok long kamap tru.

Ol kainkain hevi ol pipel i wok long go insait long en olsem, bikpela guria, sunami, o kainkain hevi we i wok long kamap long ol ples long wol.

Tasol ol manmeri i mas noken pret, long wanem, em i tok save

olsem, Bikpela i wok long redi long kam long kisim bek yumi pipel bilong en. Yumi mas sanap strong long bilip bilong yumi na noken pundaun long ol kain wok bilong graun o wok bilong Satan.

Mi amamas long pepa bilong Wantok, bilong wanem em i pepa bilong ol Kristen lain we 4-pela sios i stap pas long en. Ol i gat kainkain tok stia i kam long ol wan wan wok man bilong Bikpela na em i gutpela tru long wanem, long wok bilong ol, ol i stil autim tok bilong God long pepa bilong ol.

Em tasol na ol manmeri i mas stap strong wantaim bikpela na pas wantaim em long wok bilong lotu na sindaun wantaim gutpela tingting long Bikpela.

TRUPELA LIDA
KINA BEACH
MADANG

Katim lek na han bilong ol bikpela raskol

Dia Edita,

Mi laik sapatim pas bilong brata ya i bin kamap long Wantok Niuspepa namba 1696.

Ol gutpela lo abaiding sitisen bilong dispela kantri, ol mama grup, ol sios grup i kra i yet long ol memba bilong palamen long wokim wanpela strongpela lo long stretim dispela ol bikpela trabel olsem reip, kilim man, na ol bikpela trabel i save kamap long olgeta de insait long PNG.

Wanem taim bai Palamen i wokim wanpela strongpela lo long stretim dispela hevi bilong kilim man na reipim ol meri?

Ating ol memba i no wari long seifti bilong ol sitisen bilong dispela kantri bilong wanem ol i wari long poket bilong ol tasol.

Sori tru planti ol memba bilong yumi i no wari long seifti na laip bilong ol vota bilong ol tasol bikpela wari bilong ol em long gutpela laip na sindaun bilong ol na famili bilong ol yet.

Liklik lain memba ol i putim laik na wari bilong ol vota bilong ol long lewa bilong ol tasol planti i no sapatim ol long wokim gutpela lo long

stretim lo na oda hevi insait long kantri bilong yumi.

Dem Carol Kidu i save pait long rait bilong ol mama insait long Haus Palamen tasol ol arapela MP i no save sapatim em tumas.

Tupela strongpela lida tu long Haus Palamen em Gavana bilong Morobe, Luther Wenge na memba bilong Goroka, Bire Kimisopa.

Ol tripela i save traim long toktok strong long daunim hevi bilong ol kain trabel insait long kantri tasol ol narapela i save slip insait long Palamen na i no save opim maus long toktok. Planti i no save kamap long miting tu tasol ol i save kisim siting alawens nating. Em i bikpela sem pasin bikos ol i stilim siting alawens nating na i no mekim wok.

Mi wanpela man bilong ples, mi ting olsem Nesenel Palamen i mas wokim wanpela kompalsori lo i tok olsem - husat kriminol o raskol i reipim wanpela meri, kot i ken salim em stret long haus sik na ol dokta i katim lek bilong em.

Na sapos wanpela raskol i kilim man, kot iken salim em tu long haus sik na katim wanem han tru i holim tamiok, naip o pulim triga

bilong gan taim em i wokim dispela trabel.

Mi bilip dispela kain lo bai daunim pasin nogut bilong reip na kilim man. Wanem man i laik reipim meri o kilim narapela man bai pret nogut bai ol dokta i katim lek o han bilong em.

Dispela i wanpela tingting na long kilim trabel man i no gutpela bikos bai i gat bekim bai kamap bihain.

Mi askim watpo na ol Muslim kantri i kilim ol trabel man na yumi i no inap?

Olsem eksen gavana bilong Morobe i bin tok pinis long kamapim wanpela lo olsem: Sapos yu kilim man, mipela bai kilim yu na sapos yu reipim wanpela meri bai mipela i kilim yu.

Luther Wenge, yu strongpela lida nau insait long Palamen.


Em liklik tingting bilong mi long lo na oda. Sapos yu gat tingting bilong givim, plis raitim pas i kam long Wantok Niuspepa na bai mi lukim.

BILL HORUM
WEWAK



Yu laik autim tingting bilong yu - Salim wanpela pas i kam long Edita long:
Ol Pas i go long Edita
P. O. Box 1982 BOROKE NCD

Sapos yu save long email, yu ken salim pas bilong yu i kam long:
editorial@wantok.com.pg
Yu mas raitim tru tru nem, telepon namba na pos opis tokis bilong yu. Sapos nogat, mipela i no inap putim pas bilong yu insait long pepa.
Wantok i gat rait long katim o stretim ol pas bai em i bihainim olgeta lo bilong niuspepa.



**Toktok bilong Gavana bilong Benk bilong Papua Niugini,
Mista.L.Wilson Kamit, CBE
Long autim bilong nupela K20 mani**

Mi tok welkam na amamas long yupela olgeta long stap long autim bilong dispela nupela K20 mani long dispela apinun.

Benk bilong Papua Niugini i makim autim bilong dispela nupela K20 mani long kamap long wankain taim olsem namba 34 bon de bilong mipela, we em i tude. Long Novemba 2, 1973, wampela yangpela Michael Somare, Sif Minista i opim sentral benk bilong kantri long Douglas Strit bilding. Long dispela taim, Benk bilong Papua Niugini i op long bisnis. Long dispela taim i kam inap nau mipela i save lukluk long amamasim ol bikpela samting long bon de bilong mipela. Mipela opim nupela opis bilong mipela long ToRobert Haus long Novemba 1, 1991, na mipela autim nupela K100 pepa mani long Novemba 2, 2005.

Ol man na meri, Papua Niugini i bin autim mani bilong em yet, Kina na Toea, 32 yia i go pinis long Epril 19, 1975, 'Kina na Toea De' bilong yumi. Ol namba wan pepa mani bilong yumi i bin K2, K5 na K10, na liklik taim bihain mipela i autim K20 pepa mani, olgeta long pepa sabstret. Ol pepa mani disain i gat nesanel kres long fran na ol kainkain mani ol tumbuna bilong yumi i save yusim long baksait. Disain bilong Nesanel Palamen bihain i bin i go antap long K10 pepa mani. Bipo long 1991, olgeta pepa mani bilong mipela i bin pepa sabstret. Long stap insait long ol developmen long sekyuriti prinim bilong ol mani long wol, Papua Niugini i kamap namba tu kantri bihain long Australia long yusim polymer (Tok Pisin bai tok polima) we i olsem plastik, long kamapim mani, na i bin autim K2 long polymer pepa long makim Saut Pasifik Gems long 1991.

Dispela i bin namba wan bikpela surik long wok bilong mipela long painim wampela we long daunim kos bilong yusim mani. Mipela i painim olsem ol polymer mani i save i stap longpela taim moa long ol pepa sabstret o pepa mani tasol.

Ikonomi bilong mipela i wampela we planti ol manmeri i save yusim mani stret, o ol toea o koin na pepa mani long baim ol samting. I gat nid long mipela long givim aut ol gutpela kwaliti mani we i ken stap longpela taim bikos ol manmeri bilong yumi i ol lain bilong holim na yusim mani na kantri bilong yumi em i hap we san i save hot na ples i save drai. Mipela i mas givim aut ol mani tu we i gat gutpela sekyuriti we i stopim ol lain long mekim ol giaman mani we i luk olsem em. Wantaim ol senis long teknoloji, mipela tu i mas strongim sekyuriti bilong ol mani bilong mipela. Wampela piksa em, ol mani bilong yumi i mas stap long kwaliti na mak we ol Atomated Tela Masin (ATM) i laikim. Mani bilong yumi i mas stap long mak we ol man na masin tu inap yusim.

Ol senis we i wok long kamap yet long mani bilong yumi i bihainim ol lo bilong mipela long strongim ol gutpela pemen sistem, na tu bihainim wok bilong ol lain husat i save putim aut mani long olgeta hap bilong wol (planti taim ol sentral benk) long kamapim ol nupela disain o mak long ol mani bilong ol long daunim pasin bilong ol lain husat i mekim ol giaman mani we i luk wankain olsem bilong

mipela tasol i no tru.

Sentral Benk i laik lukim olsem mani bilong mipela i stap long gutpela mak long sait bilong kwaliti na sekyuriti na planti manmeri i wanbel long yusim na em i isi long yusim. Mipela i karimaut wok nau long kamapim wampela nupela atomatik sistem we bai strongim wok bilong kaunim, stretim na rausim ol mani we i bagarap. Dispela bai kamap pastaim long Mosbi na bihain long ol Karensi Distribusen Senta han long Maunten Hagen, Lae na Kokopo. Dispela bai lukim olsem aninit long Klin Benknot Polisi bilong mipela, mipela i givim aut ol gutpela kwaliti mani long ol pipel. Mi askim ol pipel na ol bisnis haus long helpim mipela long strongim kwaliti bilong ol mani bilong mipela. Long mekim dispela, givim bek ol mani we i olupela o bruk long ol benk na kisim ol nupela mani.

Narapela bikpela surik long histori bilong mani long kantri i bin autim bilong "Paliamentari" tingting long fran bilong ol mani. Palamen i bin kamap pinis long ol K10 na K50 i gat piksa bilong Sir Michael Somare husat i bungim Papua Niugini na karim mipela i go long Self Gavman long 1973 na bihain Indipendens long 1975.

Long 2005, Benk bilong Papua Niugini i glasim gen na senisim disain na strongim ol sekyuriti mak bilong ol dispela mani. Tasol kain stail bilong ol bilong bipo i stap yet. Long nupela disain bilong ol mani mipela i strongim tingting bilong kamapim kantri na tingting olsem yumi wampela kantri. Olsem na ol dispela mani i gat nesanel kres we i gat pisin bilong paradais i sindaun antap long kundu dram na spia na Nesanel Palamen we i kamap pinis long fran bilong K2, K10, K50 na K100. Ol disain long ol baksait bilong ol mani i wankain.

Mi laik givim luksave long wok bilong ol sekyuriti/mani printa husat mipela i wok wantaim. Mipela i save wok wantaim Da La Rue long ol pepa mani na Note Printing Australia Limitet long ol polymer (plastic) mani. Stia tok bilong ol long teknikel sait i helpim mipela long ol teknikel wok, sekyuriti na disain bilong ol nupela mani bilong yumi na i helpim Benk long mekim ol gutpela disisen long wok bilong mekim disain, prinim, tilim, stopim na rausim mani. Long sait bilong ol polymer mani, mipela i save risaikelim o tanim i go na kamapim ol samting olsem ol pot bilong plawa, wilbaro, na ol bampa bilong kar.

Wantaim ol dispela liklik toktok, ol man na meri, mi amamas tru long autim dispela nupela K20 mani we i makim namba 34 anivesari bilong Benk bilong Papua Niugini, na i joinim ol narapela mani we i gat dispela as tingting bilong Palamen. Aninit long lo yumi inap yusim dispela nupela K20 stat long Mande, Novemba 5, 2007, and bai yumi yusim wantaim ol olupela pepa K20 inap mipela i rausim olgeta.

Tenkyu na God i ken blesim yupela.



BANK OF PAPUA NEW GUINEA

K20.00 POLYMER BANKNOTES

The K20.00 banknote incorporates advanced security features to help protect the currency from counterfeiting. The polymer note still retains many of the original design elements of the previous K20.00 banknotes. Please take a moment to familiarise yourself with the security features detailed below.

FRONT



The main design elements on the front are the Parliament House and the National Crest of Papua New Guinea, which is a stylised Bird of Paradise sitting on a Kundu (drum) and a Spear.

BACK



The main design elements on the back are the head of a Boar, a Toea Arm Band from the Central Province, a Cowrie Shell Necklace from Madang and a Shell Ornament from the Western Province.

SECURITY FEATURES



1. Complex Clear Window
Complex clear window incorporating a vignette of the Bank of Papua New Guinea logo.



4. Emboss
The numeral '20' is embossed in the secondary clear window.



7. Iridescent Feature
Bird of Paradise in full flight on the back provides a colour change when the banknote is tilted.



2. Shadow Image
Shadow image of the Bank of Papua New Guinea logo, which is visible when raised to the light.



5. Offset
Complex background security patterns in multiple rainbow print.



8. Serial Number
Black serial number fluoresces yellow/green under ultra violet light.




3. G-Switch™ Feature
G-Switch™ is a dynamic optical feature that changes colour when the banknote is tilted under a light source.



6. Intaglio
Multi-colour raised keyline printing of main design elements on the front and back of the banknote.



9. Signatures
Black signatures of the Governor and the Secretary, Department of Treasury fluoresce yellow/green under ultra violet light.



BANK OF PAPUA NEW GUINEA

Autim bilong nupela K20 lip mani long yusim



1: Fran

Sais bilong Papua Niugini Nesanel Kres em i liklik moa. Em i soim Pisin (Bed) bilong Paradais i sindaun antap long wanpela Kundu (dram), wanpela Spia na Palamen Haus. Dispela i soim olsem Papua Niugini em i wanpela kantri we i gat wok bung o yuniti long en.

Ol lokel disain o mak we i raunim ol namba (20) em olsem piksa bilong pik. Disain we i raunim Palamen Haus na Nesanel Kres i bungim ol dispela kain mak we i piksa bilong ol kainkain samting long ol kainkain hap bilong Papua Niugini.

Ol dispela samting i stap long disain long dispela nupela K20:-

- Paspas wantaim ol makmak bilong Manus Ailan
- Makmak i kam long wanpela Kapkap bilong Manus Ailan
- Makmak bilong wanpela Sil bilong Pait bilong ol hap bilong Sepik
- Makmak bilong ol Pot bilong ol hap bilong Sepik
- Makmak bilong Sil long ol hap bilong Galp
- Makmak bilong Cano Prow bilong ol hap bilong Milen Be



2: Baksait

Baksait i gat ol mak we i bungim ol mak bilong ol disain bilong ol dispela samting:

- Disain i kam long tamiok bilong Maunten Hagen na sil bilong Hailans
- Disain i kam long Tapa Klos bilong Noten Provins
- Disain i kam long Kap kap long ol hap bilong Manus


- Disain i kam long ol sil long ol hap bilong Galp
- Disain bilong Sentral Provins

3: Sais o bikpela bilong em


75 x 150 millimita

4: Kala bilong em

Ol kala ol i bungim em ret, pepel, grin, yelo na braun.



PNG: Oro hai wara wok helpim i kam isi tasol wok i kamap



HEVI: Taitwara nau i karamapim bikpela hap eria insait long Oro Provins bihain long ren i pundaun strong tru inap wanpela wik olgeta. Ol disasta opisa i tok samting olsem wanpela ten seven pipel i day na wanpela ten nain i lus yet. (AAP Image/The National).

KODINETA bilong ol wok helpim insait long bikpela hai wara long Oro Provins bilong Papua Niugini (PNG) i tok disasta menesmen tim bilong Mosbi i wok long glasim ol bagarap hai wara i bin kamapim.

Copland Gewa i tok ol pipel bilong provins bai bungim bikepla hangre na ol kainkain sik sapos ol

i no kisim helpim kwik.

Ol ripot i tok moa long 70 pipel i dai, na nara-pela 13-tausen pipel nau i no gat haus insait long provins, bihain long Saiklon o traipela raunwin Guba i hamarim provins long wik i go pinis.

Mista Gewa i tok ol wok bilong kamapim gut provins na ol helpim bai ron isi isi na bai dia moa.

Australia Leba lida bai wokbung wantaim Melanesia sapos em i kamap PM

OPOSISEN Leba Lida bilong Australia, Kevin Rudd i tok ol refuji inap lusim ol kantri bilong Melanesia, long wanem ol pipel i tarangu

o i lus olgeta.

Em i tok Australia i gat rait na long givim moa helpim i go long ol Melanesia kantri olsem Papua Niugini, Solomon

Ailans na Vanuatu.

Mista Rudd i tok sapos ol i makim em olsem praim minista, em bai wok bung wantaim ol lokol gavman

insait long Melanesia, long kamapim gut gen ol wok pren.

Federal ileksen bilong Australia bai kamap long Sarere.

Nu Silan Imigresen no laikim ol fatpela pipel long go long kantri

OL NU Silan Imigresen opisa i tok wanpela man bilong Briten, husat i bin go long Oklen (Auckland) long wok, olsem meri bilong en i pat tumas long go bungim em.

Peter Lewis i ripot, dispela man Richie Tresize, krismas bilong en 35, i bin go long wanpela 'daiet' long lus weit long em i no ken yusim helt sistem bilong kantri sapos em i sik.

Telecom Nu Silan i bin kisim Richie, wanpela man save long sabmarin kebol tasol klostu em i bin abrus long wok long wanem ol i painim em i abrusim mak bilong 'bodi fat' long mak imigresen i askim.

Na nau, meri bilong em, Rowan, krismas bilong em 33, husat ol nius ripot i tok, em i les pinis long laip insait long UK, i stap tu long wanpela 'daiet' pro-

gram long lus weit long em i ken joinim man bilong en long taim bilong Krismas.

Mista Tresize i tok tupela marit i amamas long i go stap long Nu Silan.

Ol toktok em ol i raitim long Emigrate New Zealand websait forum i tok makim planti ol save manmeri i no bin kisim wok long Nu Silan long wanem ol i 'ovaweit' o pat tumas.

TOK PISIN NEWS

 from Radio Australia

 radioaustralia.net.au

 Tok Pisin Service

 6am - 7am (GMT+12:00)

 5995, 6020, 9710, 12300(KHz)

FIJI: Gavman i makim olpela Atoni Jeneral bilong Australia

AMI Gavman bilong Fiji i makim Atoni Jeneral bilong Australia bipo, Robert James Ellicott, long i go pas long painim aut ol sas i go agensim Sif Jastis em ol i rausim em long wok long dispela namel taim.

Pasifik Niusman Campbell Cooney i ripot ol i bin pinisim wok bilong Sif Jastis Daniel

Fatiaki long yia i go pinis, bihain tasol long kamap bilong Ku, na i bungim ol sas, bilong i no mekim gut wok bilong en taim em i holim wok.

Dispela wok painim bung bai stat long wik bihain, we olpela Australia Atoni Jeneral, Jastis Robert James Ellicott bai go pas long tripela memba bilong

tribunal. Ol arapela memba bilong Traibunel, em long Hong Kong Hai Kot Jastis Raymond Sears na Malaysia Hai Kot Jas, Dokta Lal Chand Vohrah.

Jastis Ellicott i bin Australia Atoni Jeneral long 1975 i go nap long 1977 insait long Liberal Gavman bilong Malcolm Fraser.

Australia Foren Afeas Minista i kamap long Singapore long bung

FOREN Minista bilong Australia, Alexander Downer, i kamap pinis long Singapore long stap insait long bikpela bung bilong ol lida bilong Is Esia.

Wanpela tokbung bilong 'klaimet senis' na envaironmen, ol i bilip ol lida bilong rijen bai sainim.

Jeff Waters i ripot olsem Foren Afeas Minista i stap long bung long makim Praim Minista, husait i no nap i go. Dispela bung i save bringim ol lida bilong Saina (China), Japan,

India, Saut Korea, Nu Silan na tepela memba bilong Asosiesen ol Saut Is Esian Nesen.

Mausman bilong Yunaitet Nesens long Burma, Ibrahim Gambari bai toktok long dispela bung, tasol Burma i bin askim long ol i mas rausim askim bilong en long bung.

Em i tok, em i sori olsem em bai ino stap long dispela bung, tasol em i wanbel na amamas long wanpela singaut bilong ol kantri bilong ASEAN long Burma ami gavman i mas sanis.

Ol pipel long Oro inap bungim sik na bagarap

KODINETA bilong ol wok bilong helpim pipel long Oro Provins em bikepela taitwara i bagarapim long Papua Niugini (PNG), i bin tok pipel em ol i kisim bagarap long dispela bagarap inap bungim bikpela hangere na sik sapos helpim i no

kamap long ol kwik.

Moa long sevenpela ten pipel ol i tok i bin dai pinis long Papua Niugini wantaim nara-pela 13 tausen nau i nogat haus long stap long Oro Provins bihain long saiklon Guba i bin kamap long provins. Ol opisal bilong PNG

disasta i bin tok namba bilong pipel i dai inap i go antap, taim planti moa inap dai long sik i kam long ol doti wara.

Kodineta bilong disasta, Copland Gewa i bin tok dispela hap nau i bagarap tru na ol pipel bai inap bungim bagarap yet.

Amerika i gat plen long Pakistan

AMERIKA i gat plan long skulim na mekim bikpela strong bilong para militari fos long ol ples long Pakistan-olsem long putim ai long al Qaeda na Taliban.

Niusmeri long Washington Kim Landers i ripot olsem hetkwata bilong Ami bilong Amerika, o Pentagon i bin tok mekim bikpela namba bilong paramilitari long Pakistan ol i wok long tingting long en inap sampela mun nau, tasol ol i statim wok long en yet.

Dispela fos, em wok rikrutiment ol i save kisim i kam long ol viles "long

Pakistan, i no bin kisim trening, o masin long Amerika bipo."

Amerika militari iwok long bilip strong long yusim save bilong em i mekim long Anbar provins long Irak we ol vilis paitman ol i bin kisim ol na i kamap gutpela pren we oli halivim gut America na pait igo long al Qaeda.

Long wankain taim Special Operation Komand bilong Amerika i kamapim narapela plan ken olsem we bilong mekim bikpela ol wok bung wantaim Pakistan militari long pait agensim teroris.

Pacific BEAT

 Listen to Radio Australia

 101.9FM Port Moresby


 4. 5. 6am & 4pm. 5pm

 including sport

 Radio Australia current affairs programme which focuses on island nations, bringing you morning and evening coverage of Pacific current affairs including interviews with political leaders, newsmakers, and the people who make the Pacific beat.

Pastaim Malokiss memba mekim nem long Solomon Ailans musik

GUTPELA samting tru taim yumi save harim nem bilong ol musik atis bilong Papua Niugini (PNG) i bikpela long musik bisnis bilong ol arapela kantri.



Sampela long ol em Tribe of Jubal na Aaron Choulai long Australia, ol mangi Papua bilong ben Kekene long Solomon Ailans, na nau wanpela nupela PNG blut i wok long kirapim das long Honiara.

Tasol ating namba wan bikpela samting ol i mekim i kamap long PNG em we Solkiz em i holim taitol olsem king bilong ol redio musik program wantaim 4-pela singsing bilong ol.

Na ol dispela lain i bikpela tru we ol i bin pinisim 42 wik ron bilong singsing Swit Love bilong Patti Doi.

Ol mangi bilong Solkiz i bilong Honiara insait long Solomon Ailans na mi harim olsem nem bilong ol long PNG i winim nem bilong ol long ples bilong ol stret. Tasol PNG i ken ples bilong ol tu bikos wanpela long ol em i bin wanpela bipo memba bilong Malokiss ben husat i bin mekim nem long 1990's. Ol i bin sut i go antap long Top 5 wantaim switpela singsing bilong ol, Daiguai.

Ol ripot i kam long Honiara i soim olsem wanpela memba bilong Sentral Provins ben i bin go long Solomon Ailans na maritim wanpela Solomon Ailans meri na em i as bilong kamap bilong dispela ben.

Solkiz i stap aninit long lukaut bilong wanpela man PNG yet, em Robert Guria. Em i wanpela wokman bilong ANZ Beng long Honiara.

Na mi harim liklik stori tu olsem nem bilong ben em Malokiss yet, tasol ol i senisim wantaim tripela namba wan leta bilong Solomon Ailans i go long fran na long baksait em laspela 4-pela leta bilong Malokiss. Dispela em ol i senisim i go KIZS long kamapim nupela ben SOKKIZS.

Long strongim moa dispela bris namel long Solomon Ailans na PNG, ben Solkiz bai kamap long Mosbi wantaim sampela konsent na wanpela tua o raun long pinis bilong dispela mun i go olgeta long stat bilong mun i kam.

Kain musik bilong ol i kisim planti bikpela stail bilong Sentral Provins musik yet we Malokiss i bin save pilaim gut tru long PNG long 1990s.

Solkiz i bin kamap insait long ol PNG redio

sat long mun Ogas dispela yia na ol i bin kirapim bel bilong planti long PNG wantaim namba wan singel bilong ol Daiguai. Dispela em singsing bilong Malokiss, na ol i singim long stail bilong ol yet.

Em nau dispela singsing i sut i go sindaun insait long Top 10 long PNG we em i holim strong namba 9 posisen long Nesenei Wikli Hit Pareit long Yumi FM.

Bihain long Daiguai ol i kamautim Kekeni Ani Mase, em wanpela bikpela singsing bilong ol mangi Tubuseria long Mosbi, em ol DeeJays. Wankain singsing Solkiz i singim i bin go antap inap posisen 11 bipo long em i pundaun gen.

Ol arapela singsing bilong ol em Darling (em fevret bilong mi stret) i bin kalapim musik lata i go antap long namba 5 bipo long em i pundaun i go bek. Tasol mi yet mi laikim tru dispela singsing.

Na bihain nau ben i bin autim Laea Long Mi we i bin debu long namba 15 long Nesenei Wikli Hit Pareit na bihain em i bin go rausim Swit Love bilong Patti Doi we i bin sindaun long namba wan posisen inap fopela wik olgeta.

Patti Potts Doi em i wanpela musik atis tasol i holim rekot bilong wanpela singsing i sindaun longpela taim tru long namba wan posisen. Dispela make m 42 wik olgeta. Em i soim klia olsem Tago Urere albam bilong em we em i bin produsim long Australia i bin winim planti manmeri tru.

"Solkiz i wok long bihainim lekmak bilong Kekene na bekim mipela i wok kisim long musik bilong ol i narapela kain tru ya," Bosman bilong Nesenei Wikli Hit Pareit, Kas-T i tok.

Nupela strong na nem bilong ol bai lukim ol i gat liklik sans long stap insait long PNG Nesenei Musik Awots bilong dispela yia na sapos mipela i laki bai Solkiz inap long pilai laiv long musik awots tu, em i tok.

Kas-T yet i tok olsem askim i go aut pinis long ben long kam kamap long PNG Nesenei Musik Awots we Yumi

FM i wok go pas long mekim na mi bilip strong olsem ol em wanpela ovasis ben tasol ol bai askim long kam long PNG. Las yia, Yumi FM i bin askim ol bois bilong Kekene long kam pilaim ol top singsing bilong ol long 2006 PNG Nesenei Musik Awots.

Bikos Solkiz em wanpela ben tasol bilong Pasifik long kisim askim long kam pilai long Musik Awots 2007, i wok luk olsem em bai rausim Saut Pasifik Atis bilong Yia Awot bilong 2007. Narapela as em strongpela bris em i gat wantaim Malokiss na ating sampela memba bilong en i laik kam bek lukim famili hia long Sentral Provins.

PNG Nesenei Musik Awots 2007 bai kamap long Pot Mosbi Kantri Klab long namba 1 de bilong mun Desemba na bai Solkiz i stap na pilai wantaim sampela ol arapela PNG musik atis husat i gat nem long redio na insait long ol naitklab long yia i go pinis.

Na long arapela nius bilong musik, bai Mosbi i lukim tu wanpela arapela musik atis bilong rijen i kam sua long hia, na em Edou bilong kantri Nu Kaledonia. Em bai kam raun long Mosbi wantaim ben bilong em aninit long wanpela wokbung namel long Mangrove Studios na Frans Embasi long PNG.

Wanpela agrimen o tok wanbel i kamap namel long ol Ogenaisa bilong ol Awot, Yumi FM na Total Event Company na Mangrove Studios bilong Edou bai mekim wanpela spesol pafomens long PNG Nesenei Musik Awot dispela yia.

Glasim Musik bai stat long lukluk long ol hit prediksen na husat bai winim wanem kain ol luksave long musik awots bilong dispela yia.

Olsem na yu noken abrus long baim Wantok Niuspepa neks wik long painimaut wanem tingsave bilong Glasim Musik long ol PNG na Pasifik musik atis.

Yu ken ritim Glasim Musik long Tok Inglis tu insait long The National tasol olgeta Mande.



PASIFIK MUSIK: (Antap) Kekene bilong Solomons Ailans i bin pilai long 2006 na Edou bilong Nu Kaledonia bai pilai long Musik Awots neks mun. FAIL FOTO

PABLIK NOTIS

Moa namba i go antap long telepon namba bilong ol mobail telepon

PANGTEL i laik toksave long ol kastoma na ol manmeri bilong pablik olsem ol namba i save stap olsem telepon namba bilong ol mobail telepon i go antap moa long 7 i go inap 8. Dispela senis i bihainim nupela plen bilong gavman ol i kolim ICT Polisi 2007.

Olgeta mobail telepon namba nau bai gat 8-pela namba long en na bai stat wantaim wanpela lida namba olsem 7 - Em olsem; 7XXXXXXX (8-pela dijit o namba).

Ringim mobail sevis provaida bilong yu long kisim moa toksave na tok klia.

**Tok orait i kam long:
Charles S. Punaha
Ekting Dairekta Jeneral**



Tok pilai wantaim Kanage olgeta wik



Traipela ren long Mosbi na ol PMV bas i no ron long apinun. Kanage pinis wok na i go sanap long bas stop. Tarangu sanap i go longpela taim na em i waswas long ren. Kanage kirap stat long wokabaut bihainim rot i go long 9 Mail.

Boi wokabaut yet na em lukim wanpela kar i ron isi i kam na stop. Kanage kisim taim long kol na hariap tru kalap i go insait. Taim em i sindaun, em kirap nogut olsem nogat draiva. Kanage i laik opim dua tasol kar i stat long ron isi. Kanage i lukluk i go long rot na em i lukim

wanpela kona long rot. Kanage lukim dispela na em i stat long prei. Bipo kar i kamap long kona, wanpela han i kam insait long windua and tanim stia. Kanage i pret moa taim han ya i go kam insait long windua klostu klostu long tanim stia. Taim kar i abrusim kona, Kanage opim dua na ron i go long wanpela liklik maket long arere long rot. Kanage i kra i wantaim na tokim ol lain long maket long stori bilong em. Ol sanap yet i stap na kar ya ron isi i kam stop long arere long maket. Kanage i kirap nogut na lukim tupela man i sanap bihainim long kar. Narapela lukim Kanage na tokim poro bilong em. "Em man ya tasol kalap long kar taim yumi pusim i kam long kona ya." Ol lain long maket ya i no isi long lap long Kanage.

**Mambu
Wantok Bilong YuYet**

Kanage em bilong Not Kos bilong Madang.

Wanpela taim em i go raun long taun na em i lukim wanpela meri Wali. Kanage lukim em na olgeta spet na wara long nek na maus i drai nating. Kanage wokabout isi tasol i go long baksait bilong meri ya na tok: "Ain o Meri Wali. Elaga, yu karim stret ya!" Meri Wali harim olsem na tanim na tokim Kanage long Tok Inglis olsem: "You think I carried for you ah. Never Yah!" Dispela toktok bilong meri Wali kilim gutpela pilings bilong Kanage. Em sakim het na tok: "I didn't say you carried for me. I said you carry it because you got it too yah!"

**Starford Chris
Madang**

Wanpela de Kanage i hangre nogut tru. Em go long gaden rausim olgeta tapiok i kam long haus. Long wankain taim meri bilong em i boilim hot wara i stap insait long haus kuk. Kanage putim ol tapiok insait long haus na go

slip stap. Meri i singautim Kanage taim wara i boil: "Yu slip tumas long wanem? Rausim skin bilong tapiok bilong yu na karim i kam na mi stretim." Kanage i slip indai na em i kirap nogut taim meri bilong em singaut long em. Kanage harim toktok bilong misis bilong em na em tingting krangi na bekim: "Oloman! Traipela san na yu laik sikarapim tapiok bilong mi. Yu wet, nait bai yu ken stretim." Bekim bilong Kanage wokim na misis bilong em singaut moa yet.

**Croc Kanage
Goroka**

Wanpela taim Kanage wantaim gelpren bilong em i go danis long ples Gasmata long Arowe. Musik bilong Gasmata Vaitbresen i mekim ples i paia na Kanage wantaim gelpren bilong em i no westim taim. Tupela i go long namel na stat long disko. I no longtaim na wanpela man holim as bilong gelpren bilong

Mi save yutupela em Hells Anjol bilong Mosbi, tasol inap yu tokim man yah sindaun long baksait long putim helmet bilong em?.. Neks taim bai mi bukim yutupela, oke?!



Kanage na em i singaut. Kanage belhat na bikmaus long Tok Iglis, "Atus Rokat, the tabel is kamap there! We is the Kanai sekyuriti there?" Ol lain stap klostu harim na ol lap long Kanage. Kanage kirap toktok gen, "Hey don't lap there! I don't do the form four there, I cut the banana there, the tiksa the rausim mi there!" Olgeta manmeri bagarap long lap na Kanage kisim taim olgeta.

**Bikpela Uncle
Arowe**

Kanage i gat wanpela gutpela poro bilong em long Kerema. Wanpela taim tupela dring na sindaun stori stap. Kerema ya askim Kanage, "Sagi, wanem king animol bilong yupela ol Sepik?" Kanage tokim Kerema ya long kolim king animol bilong ol pastaim. Kerema i tok king animol bilong ol em sak. Em i go moa yet na tok, "Sapos yu go painim pis long solwara na sak kisim yu, bai yu i no inap long kambek." Nau taim bilong Kanage. Kanage i tok, "Mipela long Sepik, king animol bilong mipela em pukpuk. Sapos em holim yu long wara, bai em brukim yu wantaim kanu bilong yu. Sapos yu ronawe i go antap long graun, em bai ronim yu yet i go long bus. Sapos yu sotwin na i laik go antap long diwai, em bai i no inap kaikai yu, tasol em bai pusim tang bilong

em i go antap na smelim baksait bilong yu."

**Joachim Niaka
Lae**

Kanage bilong Sepik na em i save stap long Morobe liklik taun Bulolo. Wanpela taim Kanage i stap long haus na em i tingting bai em i go we long dispela de. Kanage tingting i stap na tingting bilong sutim pis i kisim em. Em tokim ol mangi na ol i go.

Ol i bihainim rot bilong Wau i go antap we bai ol i go long wanpela ros sip i stap long em. Dispela ros sip i gat wanpela bikpela raun wara i stap we ol i save go sutim pis long en. Kanage wantaim ol mangi i go kalap i go insit long wara na daiv i go daun tru. Brats Kanage i lukim tupela pis na em i sutim narapela na wanpela i go. Kanage i kam bek antap long wara wantaim ol samting bilong em. Brats Kanage i lukim olsem sampela mangi i stap long arere bilong wara olsem na em kirap putim het bilong pis i go insait long maus bilong em na daiv i go bek insait long wara. Kanage i laik painim narapela pis we em i bin sutim na i go. Taim Kanage i swim na painim i stap pis i stap insait long maus bilong em i mekim nois na i laik i go tasol Kanage i kaikaim strong long tit bilong em.

Taim pis i meknais yu

save pis em samting bilong wara olsem na pis i wel long tit bilong Kanage na i go insait long nek paip bilong em i pas insait na tel bilong pis i poroman wantaim tang bilong em.

Kanage hariap tasol na swim i kambek antap na i go long arere bilong wara na ol mangi i lukim em na ol karim i kam long rot na wanpela PMV kar i kam na ol putim Kanage antap na ol mangi yet i kalap na ol i go long Bulolo haus sik.

Taim ol i kamap long haus sik dokta i lukim Kanage na em i ting Kanage i pilai pilai tasol taim dokta i opim maus bilong Kanage em i samting tru.

Tel bilong pis i poroman wantaim tang bilong Kanage. Dokta i wok long Kanage na i rausim pis long nek bilong en pinis na brats Kanage i tokim dokta "Tenkyu long rausim pis long nek bilong mi. Long Baibel yumi harim olsem pis i daunim Jonah na nau, mi i laik daunim pis."

**KANAGS FES
BULOLO**

Ol skwad bilong Kanage, plis salim ol tok pilai bilong yu i kam long Kanage Tokpilai, P.O. Box 1982, Boroko, NCD Port Moresby

PANGTEL

PNG Radiocommunications & Telecommunications Technical Authority

PABLIK NOTIS

Karimaut nupela PNG Telekomyunikesen Plen bilong Makim ol Namba

PANGTEL i laik toksave long pablik olsem bihainim sanapim bilong nupela PNG Telekomyunikesen Nambaring Plen, ol dispela senis nau bai kamap insait long 12-pela mun i kam:

- Intanesenel Dairek Dailing (IDD) Ekses Koud senis long 05 i go long 00;
- 7 dijit-mobail telepon namba i go inap 8-pela dijit; na
- Ol Fiks Lain telepon namba bilong wan wan ol eria tasol.

Ol dispela senis bai no inap senisim prais o kos bilong ol telepon kol. Ol stori bilong ol senis i stap olsem:

Ples / Sevis	Namba i stap nau	Senis i go long dispela Nupela Namba
MOMASE Rijen (Madang, Wewak)	8XXXXXX (7-pela dijit)	4XXXXXX (7-pela dijit)
Sauten Rijen (Sentral, Galp, Westen, Oro)	3XXXXXX (7-pela dijit)	6XXXXXX (7-pela dijit)
Hailans Rijen (Chimbu, Isten Hailans)	7XXXXXX (7-pela dijit)	5XXXXXX (7-pela dijit)
Niugini Ailans Rijen (Manus)	4XXXXXX (7-pela dijit)	9XXXXXX (7-pela dijit)
Mobail Telepon Sevis	6XXXXXX (7-pela dijit)	7XXXXXXX(8-pela dijit)
IDD Ekses Koud	05	00

PANGTEL bai mekim ol pablik toksave wantaim ol arapela stekholda lain long wanem taim dispela ol senis bai kamap. Long painimaut moa yu ken ringim PANGTEL long ol dispela telepon namba: 303 3241, 303 3220 o long feks: 300 4829.

Tok orait i kam long:
CHARLES S. PUNAHA
EKTING DAIREKTA JENERAL



Raun wantaim ol Meri na Pikinini



JACK&JILL PIKININI: Ol pikinini bilong Jack & Jill Pri-skul wantaim eksen singsing bilong ol.



CARITAS PNG DAIREKTA: Mary Toliman em nupela bos bilong Caritas PNG long kirap bilong Sosel Jastis Sande Program.



LONG PLES FURAN: Ol pikinini, yangpela na manmeri bilong ples Furan ausait long Madang taun i harim ol toktok long wanpela bikipela samting i kamap long ples bilong ol.

Wok wantaim long sapatim ol pikinini

Veronica Hatutasi i raitim

ASKIM i go long gavman, ol non gavman oge-naisesen (NGO), ol sios na papamama long strongim wok bung long sapatim laip na gutpela sindaun bilong ol pikinini.

Dairekta long Welfea bilong ol Pikinini wantaim Komyuniti Dvelopmen, Isabel Salatiel i wokim dispela toktok long kirap bilong Caritas PNG Sosel Jastis Sande Program.

Het tok bilong program em "Larim ol Pikinini i kam

long Mi" na dispela em i program bilong Katolik Sios long luksave long Intanesenel De bilong ol Pikinini we bai kamap long Mande i kam, Novemba 20.

Misis Salatiel i askim gavman, ol NGO na ol sios wantaim tu ol papamama long kamap ol gutpela piksa insait long ol ples, famili na komyuniti sapos ol i-laikim ol pikinini i kamap ol gutpela manmeri bilong dispela kantri.

Taim Misis Salatiel i tok ol pikinini i gat rait we ol dispela lain i mas lukluk long en, em i tok ol pikinini tu i gat wok.

"Mi laik tok strong long ol pikinini olsem tru, yupela i gat rait tasol yupela i gat wok long mekim.

"Taim ol papamama i salim yupela i go long skul, yupela i mas wokim sait bilong yupela long bihainim stretpela pasin na wokim gut long skul," Misis Salatiel i tok.

Taim em i tok tenkyu long Caritas PNG, ol sios na NGO grup long wok ol i mekim long lukautim ol pikinini na meri, em i tok long planti yia i go pinis, gavman i no bin wari tumas long sindaun bilong ol pikinini.

Tasol wantaim ol kain sosel hevi na trabel we i wok long kamap long ol pikinini, ol meri na famili, sosaiti i no inap tanim bak-sait moa long ol pikinini na gutpela sindaun bilong ol, em i tok.

Em i tok olsem bihain PNG gavman na Yunaitet Nesens (UN) i bin sainim Yunaitet Nesens Konvensen long Rait bilong ol Pikinini long 1993, em i amamas olsem gavman nau i wokim samting long lukautim ol pikinini taim em i kamapim Pikinini Rait Lo las yia.

Painim gutpela rot long stretim wari

I MOA beta long ol manmeri i painim gutpela rot long stretim ol hevi na wari na i no long paitim na bagarapim meri.

Sekretari bilong Dipatmen bilong Komyuniti Dvelopmen, Joseph Klapat, i tok olsem taim em i autim kros bilong em long ripot i bin kamap long nius olsem long Westen Hailans Provins olsem wanpela man i bin rausim klos na paitim pulim wanpela meri long pablik ples, na ol pipel i bin sanap lukluk tasol taim dispela i kamap.

Ol nius ripot i tok dispela meri i bilong Lumusa Distrik insait long Westen Hailans.

Bihain long ol ripot olsem ol man i wok long bagarapim planti meri na ol pikinini meri long Papua Niugini (PNG), Mista Klapat i tok, "pablik i noken lukluk tasol. Em i kamapim sem long komyuniti na stopim ol man na meri long kamapim ol gutpela wok ol inap long mekim."

Mista Klapat i tok Dipatmen

bilong Famili na Komyuniti Dvelopmen (DFCD) i wok nau wantaim ol narapela gavman ejensi o opis long strongim gutpela go het bilong ol meri long sait bilong rait, sanap na kisim wankain luksave olsem ol man na sapatim ol long sait bilong wok ikonomi.

"DFCD em wanpela gavman dipatmen tasol we i gat wankain mak bilong man na meri i holim ol menesmen posisen. Mi save olsem dispela i kamap bikos long komitmen bilong mipela olsem man na meri wantaim i sanap wankain na wankain luksave i mas i go long ol," Mista Klapat i tok.

Em i tok maski olsem ol nius-lain i karim ol nius stori long ol pasin nogut na bagarap ol man i mekim long ol meri bilong ol, planti long pablik i wokim yet.

Em i askim ol atoriti long wok wantaim DFCD long stretim dispela hevi bikos kantri i no inap long develop sapos i nogat gutpela luksave long ol meri.

PNG mas gat politikel lidasip long daunim bagarapim meri

I MAS i gat politikel lidasip long go pas long ol senis insait long olgeta mak bilong komyuniti sapos yumi laik daunim pasin bilong paitim na bagarapim ol meri na sapos yumi laikim Papua Niugini (PNG) stap gut.

Ol meri lida long Profesenel Wimens Klub (BPW) bilong Mosbi i tok dispela insait long wanpela bung bilong ol.

Insait long bung toktok, Dokta Miriam O'Connor i tok, "I mas i gat ol nupela program long skulim ol pikinini man na ol arapela man i sut long seksuel na riprodaktiv helt (long ol hap bodi bilong ol i save wokim bebi long ol) na wok bilong ol long mekim disisen insait long famili na rot bilong lukautim famili.

"I gat nid tu long givim skul long ol polis, ol kot lain, ol dokta na ol helt woka na ol i ken adresim gut ol komplem long vailens na givim gutpela helpim, sapat na kea long ol meri i stap long dispela kain hevi," Dokta O'Connor i tok.

BPW i save sapatim skul bilong ol pikinini meri long na givim skolasip long ol meri sumatin na ol yangpela meri long skruim skul bilong ol long teseri mak olsem koles o yunivesiti.

Bihainim dispela bung toktok bilong ol, BPW bai redim wanpela buk wantaim ol stia tok bilong helpim ol i mekim wanem samting sapos ol man i laik mekim samting nogut long ol na bilong mekim ol helti na seif tingting na wok long laip bilong ol.

Ol Wantok Stap AIDS Fri - Wina #1: STANLEY WANGI, PO BOX 536 MAPRIK, ESP.

Wina #2: ALBERT AKMA, PAUP KOMYUNITI SKUL, AITAPE, SANDAUN. Wina #3: FRANCIS BARI, DISTRIK TREASURY, AITAPE, PO BOX 152, AITAPE, SANDAUN.

Olgeta winas mas ringim Darren Stocks or Maila Kidu long Airlines PNG - Phone: 325 2011 Ext: 154 or 161

WANTOK

"WANTOK STAP AIDS FRI" 2007 KUPON KOMPETISEN



Stap insait long Krismas bonas dro na winim K300 kes moni, FTC Musik CD's na Kasets wantaim Mini Stereo Plaia bilong CD/ Kaset na Mobail fon. DRO DE: FRAIDE, Disemba 14th, 2007

Raitim ol ansa bilong yu na salim kupon i kam long: WSAF KEMPEN, P.O.Box 961, Boroko, NCD.

Tel: 325 4718 Mobail: 682 5865

Kamap wanpela fri netwok kempen memba bilong "Friends That Care (FTC) Production. Ringim mipela nau long painimaut moa.



PNG MICRO-FINANCE LTD Helpim Yu Long Lukautim Yu Yet



The Printing Haus

Question: Q43: HIV Kaunseling em i wanem samting?

Answer: _____

Name: _____ Sex: _____ Age: _____

Address: _____ Contact: _____



Pro Ma bisnis i gutpela

Natasha Bodger i raitim

VICTORIA Puoi, wanpela meri bilong Wabag i bin kisim bikpela luksave long Sarere taim Faunda na Menesing Dairekta bilong Pro Ma, Val Fittler i bin makim wantaim Sinia Dairekta Gol Eagle bes.

Dispela bes i makim Misis Puoi olsem wanpela bikmeri insait long Pro Ma opis long Papua Niugini (PNG) na namel long intanesenel komyuniti bilong Pro Ma.

Misis Puoi, husat i bin wok olsem nes bipo i tok em laik bilong em i kirap taim em i save lukim ol sik manmeri i les long dring marasin long wanem bodi bilong ol i save les.

"Taim mi wok long haus sik, mi save lukim planti i les

long dring marasin long wanem teis i no gutpela na marasin i gat kainkain kemikol we ol sik pipel i save les long en," Misis Puoi i tok.

Olsem na taim em i bin painim ol marasin bilong Pro Ma we el i save mekim long ol diwai na plawa bilong graun, em i laik save moa.

Annie Wama, wanpela meri bilong Is Sepik i bin soim Misis Puoi long Pro Ma long 2002 na taim em i traim, em i laikim stret.

Em i tok olsem em i lukim olsem planti long ol prodak i gutpela na tu ol samting ol nekles na ol paspas bilong bodi i gutpela.

Poromeri bilong em, Annie i bin mekim wanpela demonstresen long en, yusim ol prodak aninit long

Grace Prodak bren nem na em i lukim olsem ol samting ya bin mekim bodi bilong en i kamap gut.

"Annie i bin soim mi tu long wanem kain mani yu i nap long kisim taim yu salim ol Pro Ma prodak na mi ting olsem em i gutpela samting stret," Misis Puoi i tok.

Long dispela taim i nap nau, Misis Victoria Puoi i wok long salim ol Pro Ma prodak olsem wanpela distribyuta na nau em i kamap wanpela Sinia Dairekta wantaim gol eagle long soim wanem posisen em i holim.

Em i tok olsem em i amamas nau long wanem em i kamap bos bilong en yet na mani we em i mekim long salim ol prodak i gat gutpela kaikai.



PRO MA BISNIS: Meri Wabag, Victoria Puoi i kisim luksave olsem wanpela bikmeri insait long Pro Ma opis hia long Papua Niugini na intanesenel komyuniti bilong Pro Ma.

Salim henkraf samting i helpim wanpela Ambunti famili

Veronica Hatutasi i raitim

WOKIM ol henkraf na salim em i wanpela rot sampela ol mama na liklik lain man i mekim long kisim mani na helpim ol yet na famili long sindaun bilong ol.

Meri Wantok i bin limlimbur i go long naispela ples Madang na bungim wanpela famili bilong Is Sepik Provins na ol hauslain bilong ol i salim ol henkraf, ol kaving na ol atifeks insait long Madang Risot banis eria. Na dispela em laip bilong ol we ol i save kisim mani long en.

Paul Waiman, meri na famili bilong em i bilong Paugui Senses Divisin,

Ambunti Distrik insait long Is Sepik.

Samting olsem 25 krismas i go pinis, ol i bin kisim tok orait long salim ol atifeks na henkraf insait long Madang Risot banis eria. Na nau, ol i sindaun i stap gut insait long banis, wokim haus ol Sepik Tambaran Haus i pulap long ol kaving, henkraf, ol basket na bilum, ol nekles na ol arapela moa na salim i stap.

Dispela i helpim ol gut tru na ol lokel na ovasis turis husat i go long Madang taun na slip long Madang Risot bikos ol i no nap long wokabout i go longwe long painim ol atifeks, bilum na basket, kaving na ol arapela tumbuna samting moa.

"Mi na meri na famili bilong mi i stap

hia longpela taim nau na mipela i autim bikpela tok amamas i go long bikman, Sir Peter Barter, long larim mipela i kam insait long banis bilong em na stap na salim ol tumbuna samting na atifeks i stap.

"Mipela i sanapim Atifeks stoa na na wokim haus slip long hia tu.

"Mi gat ol lain i wokim ol kaving, ol bilum na nekles na mipela i salim stap. Mipela i stap amamas olsem planti turis i save kam baim ol samting mipela i salim i stap," papa Waiman i tok.

Turis bisnis i helpim tru planti ol liklik manmeri long Madang husat i wokim na salim ol atifeks, henkraf na kaving bikos planti turis sip i go long hap na baim ol dispela samting bilong ol.



HEKRAF HELPIM: Wanpela mama Ambunti hauslain bilong Mista waiman na famili i sindaun long Madang Risot henkraf stua maket we i save pulim planti ol turis long baim ol samting.

Poto: Veronica Hatutasi

CHILDREN LEARN WHAT THEY LIVE!



"If a child lives with criticism he learns to condemn."

CJLU promotes peace & justice in the community

Don't be limited to your calls. . .

More Coverage



TELIKOM PNG LIMITED
"our communication company"

WE HAVE MORE MOBILE COVERAGE AREAS


Think about it. . . buy a Start-up kit with a K10.00 free call credit

- | | | | | | | |
|--------------|--------|----------|--------|---------|---------|------------------|
| Port Moresby | Wewak | Kavieng | Goroka | Angoram | Mt Turu | Yangoru |
| Kerema | Madang | Lorengau | Tari | Ambunti | Tabubil | Aitape |
| Rabaul | Kimbe | Mendi | Maprik | Lae | Kokopo | Mt Hagen |
| Alotau | Kiunga | Vanimu | Wau | Bulolo | Ramu | Wapenamanda |
| Popondetta | Bialla | Lihir | Ialibu | Buka | Arawa | Central Province |

K20
start-up kit

Plus K15.00
Free call credit

Always there!



TELIKOM PNG LIMITED
"our communication company"

B Mobile Telipay

Telikom PNG is proud to be the first to introduce an Electronic Recharge System for Mobile customers in PNG

Now you can recharge your B Mobile prepaid call credits using the all new Telipay

Here are 3 Easy Steps to follow:

1. Ask for Telipay at your favourite Telikom Shop or dealer
2. Pay for your Telipay Voucher
3. Follow the Instructions on your Telipay Voucher to recharge your B Mobile credits

Now Available in NCD, Lae, Mt Hagen and Kokopo *Coming soon to other Centres throughout PNG.*

Enquire at your local Telikom Business office or your favourite Telikom dealer for more information.

Powered by ePay



Better Products, better People

Always there!



YUMIFM Redio Program

Program bilong Wanwan De - Mande - Fraide

6am - 10am - Sankamap show - Host: Kas.T
 6:15am - Komuniti Notis Bod
 6:30am - Nius Hetlains / Bondei grittings
 STOP & SHOP GES FAIA KOMPETISEN
 6:45am - Niuspepa Hetlains
 7:00am - Major Nius Bulletin - YUMIFM Nius Senta
 7:15am - Powerhaus Hit prediksen
 7:30am - STOP & SHOP GES FAIA KOMPETISEN
 8:00am - Major Nius Bulletin - YUMIFM Nius Senta
 8:15am - YUMIFM Bisnis / Market Ripot
 8:30am - STOP & SHOP GES FAIA KOMPETISEN
 9:00am - Nius Bulletin - YUMIFM Nius Senta
 9:15am - Luksave long Komuniti (Redio Pilai)
 9:30am - STOP & SHOP GES FAIA KOMPETISEN
 9:45am - YUMI PAINIM WOK Segment
 10:00am - Nius - YUMIFM Nius Senta
 10am - 2pm - Monin Trek na Belo Pack -
 10:10am - Lukatim yu yet - Helt toktok - RH Hyper Mart
 10:15am - Powerhaus Hit Prediksen
 10:45am - YUMI PAINIM WOK Segment
 11:00am - Nius - YUMIFM Nius Senta
 11:10am - Cont'd - Lukauti yu yet - Helt toktok
 11:30am - Nius Hetlains b'long Belo Taim
 12:00pm - Major Nius Bulletin - YUMIFM Nius Senta
 12:10pm - ESI COOK RICE Belo taim Dedikesen
 12:15pm - Komuniti Notis Bod
 12:20pm - cont'd ESI COOK Belo taim dedikesen
 1:00pm - Nius - YUMIFM Nius Senta
 1:10pm - cont'd ESI COOK RICE Belo taim dedikesen
 1:15pm - Powerhaus Hit Prediksen
 2:00pm - Major Nius Bulletin - YUMIFM Nius Senta
 2pm - 6pm - Avinun Draiv Taim - Host: UNCLE ET
 2:00pm - 4:00pm (Tunde / Fondei) TOKAUT TOKSTRET
 2:45pm - YUMI PAINIM WOK Segment
 3:00pm - Nius - YUMIFM Nius Senta
 3:10pm - Avinun cruz
 4:00pm - NIUS - YUMIFM Senta
 4:10pm - SAUT B'long UNCLE ET - foapela singsing
 4:30pm - Nius Hetlains
 4:45pm - YUMI PANIM WOK Segment
 5:00pm - Nius - YUMIFM Nius Senta
 5:10pm - 6:00pm - FLAME KULCHA (1 hr)
 6:00pm - MAJOR NIUS BULLETIN - YUMIFM Nius Senta
 6pm - 00am - NAIT BEAT - Host: ANGRA KENNEDY
 6:10pm - 7:00pm Mon kamap so
 6:15pm - Powerhaus Hit Prediksen
 6:45pm - Komuniti Notis Bod (Toksave wantaim Vaviessie)
 7:00pm - 9:00pm - COCA COLA GARAMUT
 9:00pm - 00am - Nait Beat - Isi Cruz long nait
 00am - 6am - BRUKIM TULAIT SHOW
 00:00 - Early Monin Taim Cruz (ol lain brukim tulait So)

Wiken raun wantaim Wantok



BONDE LAIN: Ol skwad bilong NAU FM long bonde pati bilong ol long Lamana Gol Klub.



PATI PES: Tupela susa hia i no isi long pati. Em i orait klostu Krismas na bai gat kainkain pati bai kamap.



EM WANEM YAH?: Hia em ol piknini i kisim blesing long Sande long makim de bilong ol piknini.



MIPELA NOGUT: Ol piknini bilong PET komyuniti i redi long danis long Sande long makim de bilong ol piknini. *Ol Foto: NICKY BERNARD*

RADIO AUSTRALIA TOK PISIN PROGRAM
 HARIM LONG: 101.9 FM

Radio Australia Tok Pisin Program - MANDE

Moring - Nait

6AM Stesen Op - Nius Hetlain - Musik na ol intaviu
 6.30AM Nius na Karent Afes
 7AM Stesen Pas
 7PM Stesen Op
 7.01PM Ol Hetlain na Program Priviu
 7.15PM Spots
 7.30PM Nius na Karent Afes
 8PM Helt
 8.15PM Musik
 8.30PM NIUS
 8.40PM Spots Riplei
 8.55PM Musik
 9PM Stesen Pas

TUNDE

Moring - Nait

6AM Stesen Op - Nius Hetlain - Musik na ol intaviu
 6.30AM Nius na Karent Afes
 7AM Stesen Pas
 7PM Stesen Op
 7.01PM Ol Hetlain na Program Priviu
 7.15PM Musik na Chit-Chat
 7.30PM Nius na Karent Afes
 8PM Mama Graun
 8.15PM Musik/Spots
 8.30PM NIUS
 8.40PM Helt Riplei
 8.55PM Musik
 9PM Stesen Pas

TRINDE

Moring - Nait

6AM Stesen Op - Nius Hetlain - Musik na ol intaviu
 6.30AM Nius na Karent Afes
 7AM Stesen Pas
 7PM Stesen Op
 7.01PM Ol Hetlain na Program Priviu
 7.15PM Musik na Chit-Chat
 7.30PM Nius na Karent Afes
 8PM Focus
 8.15PM Musik/Spots
 8.30PM NIUS
 8.40PM Mama Graun Riplei
 8.55PM Musik
 9PM Stesen Pas

FONDE

Moring - Nait

6AM Stesen Op - Nius Hetlain - Musik na ol intaviu
 6.30AM Nius na Karent Afes
 7AM Stesen Pas
 7PM Stesen Op
 7.01PM Ol Hetlain na Program Priviu
 7.15PM Musik na Chit-Chat
 7.30PM Nius na Karent Afes
 8PM Youth
 8.15PM Musik/Spots
 8.30PM NIUS
 8.40PM Focus Riplei
 8.55PM Musik
 9PM Stesen Pas

FRAIDE

Moring - Nait

6AM Stesen Op - Nius Hetlain - Musik na ol intaviu
 6.30AM Nius na Karent Afes
 7AM Stesen Pas
 7PM Stesen Op
 7.01PM Ol Hetlain na Program Priviu
 7.15PM Musik na Chit-Chat
 7.30PM Nius na Karent Afes
 8PM Wantok
 8.15PM Musik
 8.30PM NIUS
 8.40PM Youth Riplei
 8.55PM Musik
 9PM Stesen Pas

SARERE

Nait

7PM Slesen op - Ol Nius Hetlain/Program Priviu
 7.05PM Musik na Chit Chat
 7.30PM Nius
 7.40PM Wantok
 8PM Lokal Ben
 8.30PM Nius
 8.40PM Musik/Chit Chat
 9PM Slesen Pas

SANDE

Nait

7PM Slesen op - Ol Nius Hetlain/Program Priviu
 7.05PM Musik na Chit Chat
 7.30PM Nius
 7.40PM Feril Blong Serah (Redio Plei)
 8PM Lukluk Bek Long Wik
 8.30PM Nius
 8.40PM Musik/Chit Chat
 9PM Slesen Pas

93 FM YUMIFM WIKLI HIT PARADE

Date Ending: Saturday: 17/11/07

W/B	LW	T/W	SONG	ARTIST	
1	1	1(4)	Laea long mi	Solkizs	
3	2	2	Oh Mama	Owa Unit	
5	5(3)	3	Crazy	Anslom	
2	3	4	Swit Love	Patti Potts Doi	
4	4	5	Mangi Moresby	Massive Sound System	
7	7	6	Anua Moagere	Patti Potts Doi	
12	9	7	K - Nait Club	Uralom Kania Anua	
10	10	8	Swit Lewa	Leonard Kania	
6	6	9	Unari	Tribe of Jubal	
8	8	10	Tugurere	Papua Originators	
14	14	11	Gutsi Peren	Suluna Toupan	
		11	12	12	Lost in a dream Leonard Kania

ft George Luff

9	11	13	Fool moon	Anslom Nakikus
0	16	14	Umangil	Giveway String Band
13	13(5)	15	Auna Fonza	Moqai
15	15	16	Darling	Solkizs
0	0	17	Oh Girl	Phi Jay
0	0	18	Gaidi lalokau	Sega Brothers
0	0	19	Kusai Sandy	Shem Calls
0	0	20	My Rocks	Toni Mex

EM TV TV GAID EMTV Celebrating 20 Years of Television Broadcasting in PNG!

FONDE 22 NOVEMBA, 2007

5.27AM STATION OPEN
 5.30AM G JOYCE MEYER
 Religious programme
 6.00AM G TODAY
 9.00AM G CREFFLO DOLLAR
 Religious Program
 9.30AM EMTV PRIME TIME LINE UP
 2.59PM STATION RE-OPEN

KIDS KONA

3.00PM G KANGOO
 3.30PM G HI-5
 4.00PM G SHARKY'S FRIENDS
 4.30PM G FOREIGN EXCHANGE
 4.57PM G EMTV TOK SAVE
 5.00PM G THE SHAK
 5.29PM G EMTV NEWS UPDATE
 5.30PM G HOT SOURCE
 6.00PM G NATIONAL EMTV NEWS
 6.30PM G CURRENT AFFAIR
 6.59PM G NEWS UPDATE IN TOK PISIN
 7.00PM G BERT'S FAMILY FEUD: 7.30PM
 G SPORT SCENE
 7.57PM G EMTV TOK SAVE
 8.00PM M 24

9.00PM M RPA
 10.00PM M THE GIFT
 The Gift is a factual new series hosted by 60 Minutes reporter Tara Brown which documents the amazing stories, trauma and importance of organ donation and transplants. (Season Premiere)
 10.00PM G EMTV NEWS REPLAY
 11.00PM PG I SHOULD'NT BE ALIVE
 MIDNIGHT Australia Network

FRAIDE 23 NOVEMBA, 2007

5.29AM STATION OPEN
 5.30AM G JOYCE MEYER
 Religious programme
 9.00AM G CREFFLO DOLLAR
 Religious Program
 9.30AM EMTV PRIME TIME LINE UP
 2.59PM STATION RE-OPEN

KIDS KONA

3.00PM G KANGOO
 3.30PM G HI-5
 4.00PM G SHARKY'S FRIENDS
 4.30PM G FOREIGN EXCHANGE
 4.57PM G EMTV TOK SAVE

5.30PM G HOT SOURCE
 6.00PM G NATIONAL EMTV NEWS
 6.30PM G A CURRENT AFFAIR
 6.59PM G NEWS UPDATE IN TOK PISIN
 7.00PM G TEMPTATION
 7.30PM G LOVE PATROL
 8.00PM G IN MORESBY TONIGHT
 8.27PM G EMTV TOK SAVE
 8.30PM G FRENCH FILM FESTIVAL
 Les Voyageurs de la Korrigane (2005) Documentary - The voyage aboard La Korrigane in the South Seas in the 1930s undertaken by five well-to-do young people the expedition saw them return to France with over 2,500 truly genuine artefacts, many of which are now prized exhibits in the Musee du Quai Branly. Their travels also took them to the Middle Sepik River where the bonds of friendship remain.
 9.30PM PG 20 TO 1:
 11.30PM G EMTV NEWS REPLAY
 Midnight Australia Network

SARERE 24 NOVEMBA, 2007

10.29AM STATION OPEN

10.30AM PG THE MUSIC JUNGLE
 11.30AM G HOT SOURCE
 Kids series
 Midday G TALKING TO ANIMALS
 12.30PM G THE GARDEN GURU
 1.00PM G BACKYARD BLITZ
 2.00PM G THE PACIFIC WAY
 3.00PM G TOTAL RUGBY
 3.30PM G THE CAR SHOW
 4.00PM G THE BOATIQUE
 4.30PM G DO IT
 5.00PM G SPEED MACHINE
 6.00PM G NATIONAL EMTV NEWS
 6.30PM G AUSTRALIA'S FUNNIEST HOME VIDEO SHOW
 7.30PM PG JUST FOR LAUGHS
 Join David Whitehill when he presents hidden camera goofs and gags as unsuspecting victims fall prey to practical jokes while going about their daily lives.
 8.57PM G EMTV TOK SAVE
 9.00PM G IN MORESBY TONIGHT
 9.30PM G TOTAL RUGBY
 10.00PM G EMTV NEWS REPLAY
 10.30PM PG AIRLINE
 11.00PM PG AIRPORT

11.30PM G GARDENING GURUS

Midnight Australia Network

SANDE 25 NOVEMBA, 2007

8.59AM STATION OPEN
 9.00AM G BUSINESS SUCCESS
 9.30 G SUNDAY (FINAL)
 11.00AM Australia Network
 3.00PM G PNG 7s FINALS
 (Live) PNG 7s action of the Bowls, Plate & Cup Final - Live from the Lloyd Robson Oval.
 5.00PM G THE PACIFIC WAY
 Midday G THE CRICKET SHOW
 12.30PM G AUSTRALIA v SRI LANKA
 ...continues
 5.00PM G SPEED MACHINE
 6.00PM G NATIONAL EMTV NEWS
 6.30PM G SEVENTH HEAVEN
 7.30PM G 60 MINUTES (final for 2007)
 8.27PM G EMTV TOK SAVE
 8.30PM M SUNDAY NIGHT MOVIE:
 MISS CONGENIALITY 2
 (2005) Comedy/Crime - After Cheryl Fraiser and Stan Fields are kidnapped, Gracie goes



TORO

Comic strip 'TORO' with four panels. Panel 1: 'TORO LAIK SALIM RIKWEST NA EM RINGIM BRO BILONG EM KASTI LONG YUMIFM...'. Panel 2: 'HALO INAP MI TOKTOK WANTAIM BRO KASTI?'. Panel 3: 'TOKSAVE, MI TOKSY BOI NA MI LAIK SALIM RIKWEST I GO LONG GELFREN BILONG MI...'. Panel 4: 'ORAIT SAPOS EM STAP LONG EA YET TOKIM EM MI WINIM EM PINIS, BIKOS MI STAP LONG KLAUT NAIN YAH!!'.

BIABIA

Comic strip 'BIABIA' with four panels. Panel 1: 'BIABIA PUTIM KLOS BILONG FADA KRISMAS NA GO LONG KRISMAS PATI BILONG OL...'. Panel 2: 'EM BAI EKI OLSEAN SANTA KLOUS NA GIVIM PRESENT LONG OL PIKININI...'. Panel 3: 'TASOL BOSSI SENISIA PLES BILONG PATI NA OL I GO LONG NARAPELA HAP... BIABIA TASOL INO SAVE...'. Panel 4: 'EM I GO KAMAP NA DAINIM OLSEM NOGAT MAN LONG HAP... HEY! OL I GO WE?! MI MAS ELI TRU YAH!!'.

KANAGE

Comic strip 'KANAGE' with five panels. Panel 1: 'KANAGE EAM BILONG WAPA SEPIK... EM I GAT BAIKOL NA SPID NA SO-OFF RAIH LONG PLES...'. Panel 2: 'WANPELA TAMA EM KUKIM LONG ROT NA LUKIM SAMPALA OL NIL PIS BILONG PLES I WOKABAUT LONG ROT NA KANAGE LAIK SO-OFF LONG OL...'. Panel 3: 'BAGA SPID I KAMA NA KATIM LONG SAIT BILONG OL NA KISIM HAI FILING STRET... OL MERI SINGAUT...'. Panel 4: 'EM WISIL TASOL LONG OL NA SINGAUT...'. Panel 5: 'BOROS INO LUKIM BANIS BILONG OL PUKPUK NA KRES IGO INGAT... OLGETA WETIM EM TASOL LONG KAM DRAIN...'.



Sem long Bas draiva

Wok i wok long go het yet long stretim Waigani Draiv rot long Mosbi. Wanpela sait bilong rot em ol woklain i putim kolta pinis tasol i pas yet. Narapela sait kolta i no go yet, na em dispela sait we olgeta kar i wok long pulim lain na bihainim i go kam. Sampela ol PMV na teks i laik sotkat na i kisim rot i gat kolta long abrusim ol longpela lain bilong kar long arapela sait. Ol i no save olsem ol polis i putim was long pinis bilong dispela rot ol i wok long bihainim. Taim ol i kamap long hap, ol polis i tokim ol long taim na i go bek na bihainim dispela longpela lain bilong ol kar i kam bek.

Narapela hevi long dispela Waigani Draiv rot em bikipela ren i kamap na ol hul i wok long kamap pinis long nupela dispela rot. Em i no gutpela piksa bilong bihain taim. Dispela rot i kos bikipela mani long mekim na em i mas stap longpela taim.

Ol pati animol

Sampela manmeri i lain bilong pati na taim ol i kisim liklik wara olsem bia bai ol painim hap bilong dani. Ol bai giamanin ol hauslain long bilas nogut na lusim haus, tasol taim nait i kam na taim bilong pati, ol bai i go long haus bilong ol poro na askim ol long givim bilas bilong pati. Sampela husat i gat kar bai haitim sampela klos bilong ol insait long kar. Tasol tingim. Sapos ol papa o mama i painim aut, glas windua bilong kar bai senis.

Baset Lokap

Baset lokap na olgeta nius manmeri go long Palamen long Mosbi long harim. Taim ol go insait long moning ol tu go lokap inap long apinun. Taim ol i ring long kar long go kisim ol, sampela bilong ol i wokabaut olsem ol laik pundaun. Hangre kilim ol wansait. Wanpela bikman kirap na tok, "Mi ting mipela kam long baset lokap tasol mipela tu kam lokap." Tokwin...

PAINIM NEM INSAIT

Word search grid with letters arranged in a grid. The words to be found are listed below the grid.

- Painim ol dispela toktok bilong 'Baim PNG Made Taso!': COCA COLA BISKET SISPOP TINPIS NUDELS BESTA KWIKTAIM PNG MADE OX & PALM OCEAN BLUE KODAK FANTA SPRITE SCHWEPES GOLDEN CRUSH NATURE'S OWNORCHY CHEEZELS SUN UP PARADISE

ANSA BILONG LAS WIK... Crossword puzzle grid with some letters filled in.

ANSA BILONG LAS WIK... Grid of numbers for a puzzle.

ANSA BILONG LAS WIK... Grid of numbers for a puzzle.

Ol ansa bai kamaut long neks wik so putim was long neks wik pepal!

EMTV TV GAID EMTV Celebrating 20 Years of Television Broadcasting in PNG!

EMTV TV GAID program schedule table with columns for time, program name, and channel. Includes programs like 'WHO WANTS TO BE A MILLIONAIRE', 'CREFFLO DOLLAR', 'THE SHAK', etc.



Laikim Penpren

NEM: Leonold Wani
KRISMAS: 18 (man)
ADRES: CLC, Centre, P.O Box 425, Wewak, East Sepik Province
SAVE LAIKIM: Harim musik, go lotu, pilai spot, mekim pren na salim pas.

NEM: Rachael Yening
KRISMAS: 17 (meri)
ADRES: Literacy Learning Centre, P.O Box 425, Wewak, East Sepik Province
SAVE LAIKIM: Go lotu, kukim kaikai, mekim pren na raitim pas.

NEM: Davis Yanaga
KRISMAS: 18 (man)
ADRES: Hill Side Baptist Church, P.O Box 547, Goroka, Eastern Highlands Province
SAVE LAIKIM: Pilai ragbi, basketbol, stori, raitim pas, mekim pren na go lotu.

NEM: Joe Eric D
KRISMAS: 17 (man)
ADRES: Bema High School, PMB, Bema, Morobe Province
SAVE LAIKIM: Ritim buk, pilai spot, lukim TV, na raitim pas.

NEM: Joshua Yawini
KRISMAS: 18 (man)
ADRES: C/- Emil Lowi, P.O Box 420, Wewak, East Sepik Province
SAVE LAIKIM: Pilai soka, pilai musik, go lotu, na raitim pas.

NEM: Marie Tommie
KRISMAS: 19 (meri)
ADRES: P.O Box 188, Aitape, Sandaun Province
SAVE LAIKIM: Pilai basketbol, raitim pas, harim musik na mekim pren na go lotu.

NEM: Ismael Larry
KRISMAS: 18 (meri)
ADRES: Angoram High School, PMB, Angoram, East Sepik Province.
SAVE LAIKIM: Go lotu, pilai gita, pilai ragbi na raitim pas.

NEM: Jamiah Senuah
KRISMAS: 19 (man)
ADRES: C/- P.O Box 4926, Boroko, N.C.D
SAVE LAIKIM: Pilai soka, go lotu, mekim skul wok, go lotu na raitim pas

NEM: Orville Carlos
KRISMAS: 28 (man)
ADRES: P.O Box 418, University, NCD
SAVE LAIKIM: Raitim pas, pilai ragbi, harim musik, raitim pas na mekim pren.

NEM: Obert Philip
KRISMAS: 17 (man)
ADRES: Bena Bena Secondary School, P.O Box 1259, Goroka, Eastern Highlands Province
SAVE LAIKIM: Pilai ragbi na volibol, harim musik, lukim Tv na mekim pren.

Tewel Nokondi

Bipo bipo tru wampela tewel man i stap long maunten Kefeya. Nem bilong em Nokondi. Dispela tewel Nokondi i stap wantaim tewel meri Nokondi na pikinini Nokondi.

Ol i stap long hul bilong ston aninit long maunten Kefeya.

Dispela tewel man Nokondi em i gat bodi tasol. Em i gat hap het, hap nus, hap maus, wampela yau, wampela ai, wampela lek na wampela han. Olsem na long Korepa tokples, as tok bilong Nokondi em olsem hap bodi.

Insait long ston haus, i gat tupela rum we wampela em tewel Nokondi em i slip long en. Na long narapela rum em meri Nokondi na pikinini Nokondi, tupela i slip long en.

Wampela ston i brukim namel long wokim tupela rum na long namel long dispela ston i gat wampela hul i luk olsem wampela windua.

Meri Nokondi na pikinini Nokondi i save kukim kaikai long rum bilong tupela na givim i go long man Nokondi. Ol i save givim i go long windua na man Nokondi i kaikai. Taim em i pinisim kaikai em i save givim plet diwai i kam bek long tupela.

Man Nokondi em i no save kam long rum bilong tupela na tupela tu i no save go long rum bilong em.

Meri Nokondi na pikinini Nokondi tupela i no save kam ausait. Nogat. Tupela i save stap insait tasol. Long rum bilong tupela, i no gat dua bilong tupela, i nogat



dua bilong go ausait o go gat dua long rum bilong em long rum bilong man na em tasol i save go aut. Nokondi. Man Nokondi tasol i Long nait, man Nokondi i

save go aut na painim kaikai long bus. Sampela taim man Nokondi em i kam daun long haus lain na katim banana bilong ol man long ples.

Em katim pinis em bai karim na wisil go bek long ston haus bilong em. Taim em kam klostu long haus em, bai em i hatim tru wisil. Meri na pikinini i stap harim em na tupela i save olsem kaikai i kam nau.

Em bai karim banana i go insait na givim tupela. Tupela bai kisim na hariap long kukim bikpela kaikai. Tupela bai kuk i stap na man Nokondi bai slip krangi tru i stap long bet bilong en. Long wanem em i gat hap bodi tasol na dispela ol bikpela rop banana i save kilim em tru. Sapos em i gat gutpela bodi yes em inap long karim hevi samting.

Tupela bai kukim kaikai na singautim em long kaikai. Em bai pinisim kaikai na bel bilong em i pulap gut tru pinis orait em bai go bek long bet na mekimsave long slip gen.

Ol dispela lain tewel Nokondi na meri Nokondi ol i stap yet long dispela hul ston i stap aninit long maunten Kefeya.

Stori i kam long Goroka, Isten Hailans Provins

Sapos yu save long sampela stori tumbuna yu laik stori wantaim ol narapela Wantok rita, salim i kam long dispela adres: Tumbuna Stori Pes, C/- Wantok Niuspepa, P O Box 1982, Boroko, NCD, PNG.

Boipren i gat laik long poromeri bilong mi

Dia Laipain
POROMAN
 bilong mi na mi i raun na stap wantaim nau klostu tupela yia na mi tupela save wok long wankain dipatmen.

Em i save tokim mi olsem em i lavim na i save mekim planti samting long amamasim mi. Tasol olgeta taim, em i save tok em i laikim tu poromeri bilong mi na wampela taim em bai go raun wantaim em.

Dispela i save mekim mi bel kaskas long wanem em i no lavim mi tru. Mi paul long wanem em i tok em i laikim poromeri bilong mi na hau na mi tupela i stap wantaim.

Mi laikim wampela man we bai inap long stap tru long me na noken tanim baksait long mi. Bai mi stretim dispela hevi olsem wanem?

Giamanim

Dia Pren,
 Tenkyu tru long pas bilong yu na tu long autim wari bilong yu wantaim mipela. Mipela i sori tru long harim long boipren bilong yu na tu long wanem kain pilings yu gat long poromeri bilong yu.

Mipela i save kisim planti pas olsem long ol yangpela taim ol i save bungim hevi long prensip bilong ol.


I gat planti samting we i save kamapim ol kain lewa bruk na tu wari olsem. Daunbilo em sampela samting we mipela i pilim i save kamapim dispela.

- Planti yangpela i save paul namel long wanem samting em tru lav na wanem samting em giaman lav;

- Planti i save mekim disisen hariap na laik marit hariap;

- Planti i save bungim ol i save bungim ol;

- Planti yangpela i save hariap



long prenim wampela tasol tingting bilong ol i olsem pikinini yet. Boipren i gat laik long poromeri bilong mi.

I gat planti narapela tasol mipela i laik painim aut olsem sapos yu tupela i stap wantaim, olsem yu save slip wantaim em tu o nogat?

Sapos em i tru olsem yu tupela i save slip wantaim, wanem samting bai kamap sapos yu gat bel na yu yet i save olsem em i laikim stret poromeri bilong yu?

Yu laikim em na yu wok long stap wantaim em tasol long lukluk bilong mipela, mipela i laikim sapos yu inap long sindaun pastaim na skelim wanem kain laip bai yu gat sapos

yu stap wantaim em.

Em i taim we yu mas opak ai bilong yu na lukluk gut long wanem em i wok long yusim yu long traim long kisim poromeri bilong yu. Sapos em i wok long mekim dispela, traim na skelim laip long bihain taim yu tupela i gat pikinini.

Mi laik tok sapos yu inap sindaun na toktok wantaim boipren bilong yu na traim na skelim sindaun bilong yu tupela pastaim.

Long wanem mipela i pilim olsem bai yu tupela i bungim hevi long taim bilong bihain taim.

Toktok long em long wanem kain pasin em i wok long mekim na traim na mekim em i save olsem yu tu meri na yu i gat pilings.

Sapos yu tingting long maritim em, mipela laik yu tingting gut pastaim long wanem i no leit long traim na statim nupela laip. Narapela samting em long noken

haitim dispela hevi yu wok long bungim, traim autim dispela ol hevi wantaim ol arapela poro we yu pilim inap long helpim yu.

God i blesim yu na stap wantaim yu

Laipain

Sapos yu gat wari o-hevi, rait i kam long Lifeline, P O Box 6047, Boroko, NCD.

Yu ken ringim mipela tu long telepon namba 326 0011.

Raitim trupela nem na adres bilong yu i kam na bai mipela i salim bekim long pas bilong yu. Mipela bai toktok long ol trupela samting yu askim long em tasol bai mipela i no inap long putim trupela nem bilong yu. Laipain



Stilim Seri Kopi em i bikpela hevi long ol fama

...CIC mas kamapim tambu – fama

James Kila i raitim

PLANTI ol kopi industri stek holda olse mol rurel fama i tokaut olsem pasin bilong stilim ol seri kopi long gaden na plentesen em bikpela hevi tru.

Olsem na ol i mekim bikpela singaut i go long ogenaisesen we save lukautim kopi industri em Kopi Industri Koporesen (CIC) long painim sampela rot long daunim dispela hevi o stopim bisnis bilong seri kopi tred long han bilong ol praivet baya.

Ol kopi fama prosesa na ol papa bilong kopi blok na plentesen i bin autim tingting bilong ol las wik long Henganofi distrik long Isten Hailans provins, insait long wanpela kopi awenes bung em CIC Seri Tred Polisi Komiti i bin ogenaisim.

Wankain bung i bin kamap long Kainantu na Aiyura long Obura Wonenara distrik we ol lain husat i save bungim hevi long ol stil man i stilim kopi bilong ol long gaden i bin kros tru na i bin tokaut long hevi bilong ol.

Planti ol kopi fama em ol CIC opisa i bin toktok wantaim ol i tokaut olsem ol i save lusim planti kopi long han bilong ol stil man. Dispela em bikos ol praivet seri kopi baya i save stap klostu na ol dispela stil man i save karim seri kopi bilong ol i go na salim.

Papa bilong Korona Plentesen long Tairora eria long Obura Wonenara distrik, Megani Kahento i tokaut olsem bikpela kopi bilong ol em i bin lus long dispela 2007 kopi sisen i go long han bilong ol stil man.

Korona Plentesen em wanpela olpela plentesen em wanpela nambawan Saina man husat i bikpela long Lae i bin planim. Bihain em i bin salim long Mista Kahento.

"Mipela i save pilim bikpela pen tru taim planti ol kopi seri i mau long diwai i save lus long nait," Mista Kahento i tok.

Em i tok prodaksen bilong kopi long plentesen bilong ol i bin go daun tru bikos long pasin bilong ol manmeri i stilim seri kopi long plentesen bilong ol.

Wanpela papa bilong Norikori plentesen i bin kra i long pablik taim em i tokaut long wari bilong em long ol CIC opisa. Em i tok olsem moa long tri kwata ol seri kopi long plentesen i bin lus long han bilong ol stil ma.

Em i tok ol i bin havestim tasol wan kwata kopi prodaksen long plentesen long dispela kopi sisen.

CIC i luksave long hevi bilong seri kopi treid na long mun Ogas long dispela yia, i bin kamapim wanpela komiti ol i kolim Seri Tred Polisi Komiti long go aut na kisim tingting bilong olgeta lain insait long kopi industri.

Ol dispela lain em ol smol holda fama, blok holdas na plentesen, ol laisens prosesa na ol praivet kopi bayas.

Long wanpela namba wari priliminari ripot em Wantok Nius i lukim wanpela kopi i tokaut olsem, planti ol dispela kopi industri stek holdas i tok olsem, stil pasin we i save kamap long seri kopi em i wanpela bikpela hevi tru long Kainantu na Obura Wonenara distrik.

CIC Seri Tred Polisi Komiti i bin bung wantaim ol fama long Henganofi distrik na planti i tok stil pasin long seri kopi long eria bilong ol em i bikpela tru.

Planti ol lain kopi industri stek holdas i singaut long CIC long kamapim sampela kain strongpela lo long tambu long ol praivet kopi seri baya long mekim bisnis long ol ples na haus lain.

Dispela em bikos ol praivet kopi baya i save mekim ol bisnis bilong ol long 24 aua na long san na de wantaim.

Taim dispela i kamap em i mekim o opim rot long ol sampela lain long hait tasin na go stilim kopi long ol gaden na salim long ol.

Nambawan bikpela as tingting bilong CIC Seri Tred Polisi Komiti em long luksave long wanem as tru bilong dispela stil pasin we i save kamap long ol kopi gaden bilong ol blok plentesen na tu ol smol holda fama.

Dispela komiti long raun bilong em long Kainantu na Obura Wonenara distrik i bin kisim ripot olsem insait long las 3-pela yia i go pinis stil pasin long seri kopi i bin antap tru na i givim bikpela hevi tru long ol blok, plentesen, na smol holda kopi fama.

Long tingting bilong ol dispela kopi industri stek holda ol i skelim olsem i gat tupela as tingting we i mekim dispela stil man long kamap.

Ol dispela ikonmik nid bilong ol manmeri, gutpela prais na maket bilong seri i stap o klostu tasol.

Ol stek holda i skelim olsem nambawan grup ol stil lain em dispela ol lain husat i nogat graun o moni na ol i save stap na stil long painim moni long peim o baim ol klos, kaikai, na skul fi na helt sevis.

Planti ol dispela lain em ol i lusim as ples bilong ol na go stap long narapela ples. Narapela tu em i olsem ol man husat

i go stap long graun bilong mama bilong ol na ol i nogat rait long graun olsem na ol i go het long stilim seri kopi long painim moni. Ol stek holda i tok namba tu grup stil lain em ol manmeri na ol pikinini long ples husat sampela i gat kopi gaden na sampela i nogat kopi gaden.

Tasol dispela ol lain i luksave olsem maket bilong seri kopi i stap klostu na ol i go het na stil long ol gaden bilong ol narapela lain na karim i go salim na kisim moni.

Sampela ol stil man i luksave tu olsem nogat was man i sekyuriti stap long ol kopi plentesen na ol i save gut sans long go isi tasol na stilim ol seri kopi.

Dispela CIC Seri Tred Polisi Komiti nau yet i wok long kisim tingting bilong ol kopi industri stek holda long ol distrik long Isten Hailans na Simbu na Westen Hailans provins bihain olgeta ripot bai ol i givim long CIC bod long kamapim polisi bilong seri kopi treid long neks yia.



DEPARTMENT OF FINANCE

NOTICE TO SUPPLIERS OF GOODS AND SERVICES TO GOVERNMENT DEPARTMENTS, PROVINCIAL AND LOCAL LEVEL GOVERNMENTS

2007 CLOSE OF ACCOUNTS

The following information about the end of the 2007 financial year is relevant to all suppliers and payees of government:

- The cut-off date for the issue of any new ILPOCs (Integrated Local Purchase Order Claim), and for the corresponding entry of commitments to the Government's PGAS accounting system, is **Friday 14th December 2007**. **NO** new 2007 year ILPOCs can be issued after 14 December 2007.
- Payment for goods and services provided to government that were covered by valid ILPOCs, will continue to be processed and paid up until 31 December 2007.
- In order to be paid in 2007, suppliers must submit invoices to the relevant department no later than close of business on the 14th December 2007. Where suppliers have delivered goods and services before the 14th December 2007, invoices should be submitted as soon as the goods and services are delivered to ensure payment in the 2007 year.
- Invoices and all queries concerning payment should be directed to the paying office of the relevant department. Under no circumstances should claims be submitted to the Department of Finance other than for goods or services provided to the Department of Finance.
- Remember, in accordance with the law, only an official approved ILPOC can be recognized as a commitment and a valid claim against the state.

AUTHORISED BY:

GABRIEL YER
SECRETARY

DEPARTMENT OF FINANCE



TELIKOM PNG LIMITED
"our communication company"

Making Calls **Easier**

FROM AS LOW AS...

30t *untimed*

HARD TO BEAT!

For the Best Coverage and Cheapest Rates, stick with Telikom PNG.

Always there!

Kain Birua Agensim ol Meri

Wepela ol samting we i narakain namel long tupela em yumi noken yusim long daunim ol meri na pasim ol long luksave long ol humen rait bilong ol. Mining bilong kwaliti i minim olsem ol i mas givim wankain luksave long ol man na meri olgeta aim, tasol CEDAW i go moa yet long tok olsem man na meri i no wankain, olsem ia ol lo na polisi i mas stap long banisim ol meri long pasin daunim. Wapela rot ong mekim dispela em long ol polisi na lo i gat bikipela luksave long ol.

8. CEDAW i save rausim ol rait bilong ol man?

Nogat. CEDAW i save promotim luksave bilong ol rait bilong ol meri na ol i no save bagarapim ol rait bilong ol man.

9. Husat i save kisim gutpela kaikai long CEDAW?

Olgeta manmeri i save benefit. Maski ol meri em ol namba wan lain long benefit, strong bilong givim ol rait long ol meri em ol bikipela samting. Ol meri bai mekim moa wok, famili bilong em bai painim gutpela sindaun na kantri tu bai benefit. Ol meri i makim 50% bilong olgeta manmeri insait long kantri. Inap yu tingim ol bikipela wok kamap sapos hap bilong kantri i gat wankain sans long develop na mekim wok olsem narapela hap?

10. Ol meri ken mekim wanem wantaim CEDAW?

I no gat banis long samting ol meri i ken mekim wantaim CEDAW. I bin gat ol bikipela wokabaut i go het bilong ol meri long olgeta hap long wol bikos long CEDAW na insait long Pasifik dispela wok i kirap pinis. Insait long sampela yia bihain long ratifikesen o givim luksave insait long Pasifik long sampela bikipela senis i kamap na strong bilong wan wan senis em i bikipela samting bilong ol meri. Olsem:

*Fiji - Ol kot i aplaim pinis dispela Konvensen long sanapim ol strongpela mekim-save moa bilong reip na pasin pait na long senisim ol neseneliti lo insait long Mama lo bilong ol Fiji sitisen meri husat i marit long ol man husat i no bilong Fiji.

*Vanuatu - ol kot i aplaim pinis CEDAW bilong ol meri na pikinini husat i no bilong Vanuatu bai ol i gat rait long holim ol kastomari graun.

*Kiribati - wapela prosekyuta lo man long Kiribati i yusim pinis CEDAW long strongim kes agensim wapela lo i save daunim strong bilong ol meri insait long ol reip kes. Maski dispela kes i no bin win long dispela wapela toktok tasol, em i bin opim dua long Kiribati bilong strongim toktok bihainim CEDAW insait long ol kot i kamap long bihain taim.

OL ATIKEL BILONG CEDAW I TOK WANEM?

Atikel 1 Diskriminesen o pasin bilong daunim ol arapela

Diskriminesen agensim ol meri i minim wanem kain pasin o sindaun we i no givim inap luksave long ol rait bilong ol meri na olsem em i save banisim ol meri long kisim wankain luksave olsem ol man.

Atikel 2 Ol Polisi bilong stopim diskriminesen agensim ol meri

Ol kantri we i sainim pinis na tok oraitim CEDAW i mas karamapim tu ol prinsipol bilong ikwaliti insait long ol konstitusen na lo na i mas mekim olgeta samting long stretim ol kastom we i save daunim ol meri.

Atikel 3 Ol Besik Humen Rait

Olgeta besik humen rait na fridom bilong ol meri i mas go long ol long wankain mak wantaim ol man.

Atikel 4 Sotpela taim wok bilong painim wankain luksave

Ol gavman i mas karimaut ol dispela sotpela taim eksen long skruim wankain luksave bilong ol meri i go het moa. Dispela em ol spesol sotpela taim wok we i stap inap wankain luksave i kamap.

Atikel 5 Sosol na kalsarel tingting na pasin

Ol gavman i mas mekim wok long senisim ol komyuniti na kalsarel pasin na tingting we i save daunim ol meri na long givim wankain luksave na wok bilong lukautim ol pikinini wantaim gutpela famili edukesen, lo na ol polisi.

Atikel 6 Pasin pamuk salim hait ol meri

Ol gavman i mas mekim samting long stopim olgeta kain salim bilong ol meri na pasin pamuk. Sapos ol i mekim olsem, ol gavman mas stretim tu ol bikipela as bilong pasin pamuk na kamapim ol arapela rot bilong pulim ol pamuk meri i kam bek insait long komyuniti.

Atikel 7 Politik na Pablik Laip

Ol gavman husat i sainim pinis Konvensen i mas mekim wok long stopim

diskriminesen insait long pablik na politiks laip na i mas luksave long ol meri olsem ol i gat rait long vot na i mas gat rait long vot na gat sans long sanap long ileksen long olgeta level. Ol meri i mas i gat sans long stap insait long wok bilong mekim gavman polis, long holim ol bikipela pablik wok na mekim wok insait long ol non gavman ogenaisesen (NGO).

Atikel 8 Wok long Intanesenel Level

Atikel em long helpim ol meri long makim ol kantri bilong ol long intanesenel leve na wok insait long wok bilong ol intanesenel ogenaisesen.

Atikel 9 Neseneliti o bilong wanem kantri

Ol meri i mas gat sans long baim, senisim o holim yet neseneliti o nem bilong kantri bilong ol, maski ol i marit o singel na wanem ples man bilong ol i kam long en na long gat wankain ol rait bilong ol neseneliti bilong ol pikinini bilong ol.

Atikel 10 Edukesen

Dispela seksen em ol i mekim bilong helpim ol meri long kisim olgeta kain kain skul, helt na famili plening, long stopim ol buk i lukluk long ol man tasol na long strongim tingting bilong skulim ol mangi na meri wantaim na long pulim ol meri na pikinini meri long stap moa insait long ol spot.

Atikel 11 Wok

Ol gavman i mas luksave olsem ol meri i ken kisim wankain gutpela rot i go long wok, wok trening, wok sekyuriti, pe, ol benefit, banis agensim rausim long wok taim ol i bel na i mas i gat sapot bilong ol wok lukautim bilong ol meri na man wantaim aninit long sosol sevises.

Atikel 12 Helt Kea na Famili Plening

Ol gavman i mas givim ol besik helt kea bilong ol na opim rot i go long ol helt kea, famili plening, na helt kea taim ol i bel.

Atikel 13 Ol Ekonomik na Sosol Benefit

Gavman i mas promotim sindaun bilong ol meri insait long ekonomik na komyuniti laip, wantaim wankain rot i go long kisim ol famili benefit, wantaim ol dinau na kredit, na malolo, spots na kalsarel laip.

Atikel 14 Ol Ples Meri

Ol ples meri em wapela grup bilong ol meri husat i no save kisim luksave insait long ol plen bilong gavman. Dispela atikel i tok olsem ol gavman i mas opim rot na givim luksave olsem ol ples meri i mas stap insait long wok developmen, na gat rait long ogenais o stretim ol yet, gat rot long kisim kredit, ken kisim ol dinau bilong apriet teknologi na wankain luksave long agrikalsa rifom o senis na tu long famili plening na sosol sekyuriti na gutpela sindaun.

Atikel 15 Ful Nem na Luksave aninit long lo

Ol meri i mas gat ful nem na sindaun na wankain namba aninit long lo, wantaim wok bilong go insait long ol kontrak, administresen o bosim graun, olgeta hap wok bilong kot na traibunel na fridom bilong wokabaut i go kam na rait bilong gat haus slip.

Atikel 16 Marit na famili

Dispela tikel i save promotim o tok strongim wankain luksave bilong meri wantaim man insait long ol pasin marit na famili sindaun, long marit long laik bilong em, long makim man bilong em, long taim bilong divos, na insait long mekim ol disisen bilong famili plening, wantaim lukautim bilong ol pikinini, o wanem ol arapela wok bilong propeti o graun.

Atikel 17 - 30 bilong Konvensen

I karamapim rot bilong givim ol ripot, CEDAW Komiti na ol arapela administresen wok.

I kam long "All about CEDAW in 10 Questions and Answers" - Basic Information Guide to CEDAW, em Pacific Regional Human Rights Education Resource Team (RRR), wapela projek bilong UK DFID-Pacific, 2001.



Dijisel 'Kalap Kalap' wantaim moa wok kamap

MOBAIL telepon kampani Dijisel (Digicel) nau i wok long 'Kalap Kalap' wantaim sampela moa toksave long ol bikpela wok kamap em i lukluk long en bilong 2008.

Dispela wik kampani i bin opim krismas selebren bilong en wantaim sampela bikpela toksave long ol wok developmen i stap long plen we bai stat kamap long nau krismas i go inap neks yia.

Long makim namba wan Krismas bilong kampani long Papua Niugini (PNG), ol i autim wanpela liklik nupela redio ol i wok kolim 'mini bumboks' we husat manmeri i baim nupela Dijisel mobail fon i ken kisim fri tasol.

Dispela promosen bai ron long Novemba 19 na bai stap inap Desemba 31.

Long wankain taim, husat ol kastoma i baim wanpela nupela



KALAP KALAP: Santa Klaus i no isi long kalap kalap wantaim Dijisel long bikpela toksave kampani i givim long nius midia long Mosbi long Mande dispela wik.

Poto: NICKY BERNARD

fon bai nem bilong ol i go insait long wanpela dro bilong winim 'Dijisel Trolley Dash' we em i wanpela resis bilong wina long suvim soping troli o kar i go kam insait long stua na kisim samting long laik bilong em inap long mak bilong K500.

Dispela soping troli resis bai kamap long wan wan ol supamakot nabaut long kantri namel long Novemba 26 na Desemba 17. Dijisel bai givim aut inap long K10,000 manimak fri soping long dispela krismas taim.

Sif Eksekutiv Opisa bilong Dijisel PNG, Kevin O'Sullivan i tok, "Dispela em i namba wan Dijisel Krismas long Papua Niugini na mipela i bilip olsem mipela i mas mekim dispela Krismas taim wanpela taim bilong amamas bilong olgeta. Olgeta man, meri na pikinini insait long dispela kantri i mas i gat sans long amamas long dispela taim bilong Krismas. Mipela i laik selebretim namba wan Krismas wantaim olgeta manmeri insait long Papua Niugini wantaim bikpela amamas tru. Ol gutpela prais na hai kwolati telepon hansen bilong mipela em ol gutpela krismas presen tru."

Ol arapela bikpela toksave Mista Sullivan i autim em:



AMAMAS: Bosman bilong Dijisel PNG Kevin O'Sullivan i tokaut long ol bikpela wok developmen bilong 2008.

Poto: Digicel

- I kam inap tude, Dijisel i pamim K450 milien long ol wok bilong em insait long PNG na ol bai lukluk long tromoi K600 milien moa insait long 18 mun i kam. Em bai lukim manimak ol i tromoi insait long tupela yia bilong ol inapim mak bilong K1 bilien;
- Bai ol i sanapim pinis 200 ples bilong pulim mobail sevis na bipo long Desemba 31, bai ol i sanapim sikipela ten (60) moa;
- Mobail kavris long Ailans i go long Hailans, long Lae i go Mosbi, na i go long Madang na Mendi;
- Bai ol i lonsim Bogenvil, Lihir, Kar Kar Ailan, Alotau na Kimbe insait long tripela mun i kam; na bikpela toksave tru em:
- Bai ol i sanapim wanpela nupela transmisin ring bilong givim moa rot bilong ol PNG bisnis long salim ol toksave olsem email na ol arapela samting i go kam.



ADENANTHERA PAVONINA L.

Nem bilong en: ADENANTHERA PAVONINA L.

Wok bisnis nem:

Wanem kain diwai: Wanpela liklik i go namel sais diwai i ken gro inap 20 mita longpela na 50 sentimita raunim namel bilong en. Het bilong en i gat planti han diwai.

Skin diwai: Skin diwai bilong en i 1.2 sentimita bikpela.

Ausait Skin Diwai - I lait braun, na i gat planti rop

Namel Skin Diwai - Em i grin.

Insait Skin Diwai - Grin i go klostu lait yelo taim diwai i klostu tanim i go braun.

Diwai o timba: Kala bilong em i lait yelo, na strongpela diwai bilong en i kopi braun, i strong na i hevi. Gutpela long mekim ol pos bilong haus long en.

Ol lip: Ol i no save sindaun poroman. Ol lip i rauñ. Bikpela bilong ol i namel long 2.5 na 1 sentimita. As bilong em i raunpela, i no bruk hap long namel stret.

Ol plawa: Ol wan wan plawa i liklik, i gat wanpela bilum i olsem belo, i gat 5-pela grinpela sepal, 5-pela grin na wait lip.

Prut bilong em: Wanpela flet pod, longpela bilong em i 10cm, skin bilong em i rap, i braun taim em i bikpela tru na i gat ol strongpela flet na braun sid.

McCARTHY & ASSOCIATES
National & International Forest Consultants
mmcaf@datec.com.pg
"LONG KISIM TOK STIA LONG OLGETA WOK DIWAI"



Cloudy Bay

SUSTAINABLE FORESTRY LTD

YOUR NATURAL CHOICE

(A Subsidiary of PNG Sustainable Development Program Ltd.)

ACQ PRESSURE TREATED TIMBER FOR SALE

Website: www.cloudybaytimber.com.pg
Email: marketing@cloudybay.com.pg

P.O. Box 120, Port Moresby, NCD
Ph: 325 4865/ 328 1189/ 328 1193
Fax: 325 3489

Cat 928Gz WHEEL LOADER



Rugged, dependable Cat components carefully matched to most efficiently get maximum rimpull to the ground and full power to the loader hydraulics.

The 928Gz delivers fast response and aggressive performance, even in tough applications. The Caterpillar power train makes it possible, featuring a Cat 3056E DIT ATAAC diesel engine and power shift transmission precision-matched to a Cat torque converter and rugged axles. The power train is carefully tested and balanced to provide optimum performance in all operating conditions.

Hastings Deering



Product People Commitment. We deliver.

PORT MORESBY
Spring Garden Road, Hohola, PNG
Ph: (675) 300 8300 - Fax: (675) 325 0141

	PHONE	FAX
LAE	472 2355	472 1477
TABUBIL	548 9162	548 9155
RABAUL	982 1244	982 1129
LIHIR	986 4105	986 4107
KIMBE	983 5144	983 5144

OL WIKEN SPOT DRO na POTO



SNUKA EM MIPLA YAI! Ol nius manmeri i amamas long kisim sapot long Dijisel (Digicel) na RH Kampani na Klab 22.

KAINKAIN STAIL: EPC Kap soka resis i kam wantaim kainkain stail bilong pilai.



KISIM BAL: Pilaia bilong Hekari United i kisim bal long birua bilong em bilong Besta Fighters long gem bilong ol long Madang las wiken. Ol i dro 4-4. Poto: NSL

YU AUT: Beta bilong Manolos i ron go long fes bes tasol em i aut long han bilong Air Ways Bears long gem bilong ol long Sande.

WIKEN SPOT DRO

Kopret 9 Ragbi Lig Kompetisen.
Raun 3
Fonde, Novemba 22, 2007

06:00 pm	IBS vs PPL Giants
06:35 pm	Fincorp Cowboys vs NCDC
07:10 pm	Air Niugini vs Ravenpol Tigers
07:45 pm	Smart Banking Kundus vs SP Brewery Dragons
08:20 pm	Team Bishop Bros vs BPNG
08:55 pm	Nambawan Super vs Telekom PNG
09:30 pm	Eda Ranu Rails vs Fire Fox

Midia pool Kompetisen
Raun 3, Novemba 24, 2007
Stat 1:30pm

Gem 1:	Sunday Chronicle	vs	Post Courier
Gem 2:	JFK	vs	Poimafu
Gem 3:	National	vs	NBC
Gem 4:	Wantok	vs	Outsiders



Sapos yu gat spot dro, yu ken dropim long opis bilong Wantok Niuspepa long Tunde belo taim.

EPC KAP: Ol boi Milen Be i no wari long graun i mamalum. Ol bin mekimsave stret long Telekom Pak taim Wantok Niuspepa i kisim poto long ol.



OL POTO: I KAM LONG RD TUNA

"Congratulations to
defending champions
Madang Girls
Basketball for your
many victories! May
you bring home the
gold!"



RD Tuna Cannery Ltd
P.O. Box 2113, Madang



NCD go pas long PNG Gems

I kam long pes 36

Bihain long top tripela provins, Westen Hailans i sindaun long namba 4 ples wantaim 5-pela Gol; Simbu long namba 5 wantaim wanpela Gol; Manus long namba 6; Madang long namba 7; Bogenvil long namba 8; Is na Wes Nu Briten long namba 9; na Westen na Enga i sindaun long namba 11 posisen.

Sentral, Is Sepik, Galp, Nu Ailan, Oro, Sandaun na Sauten Hailans i no winim wanpela medol yet.

Planti long ol spot i pilai i go inap long ol fainols bilong ol pinis, tasol i gat sampela long ol tim spot i stap yet we bai lukim ol spit manmeri i salens long ron na ol arapela spot tu.

Lukim moa nius ripot na poto bilong PNG Gems insait...

Sentral autim Kalibobo na strongim nem long soka

Paulus Tali i raitim

SENTRAL soka tim bilong ol man i bin kamapim wanpela gutpela pilai tru long kwota fainol bilong soka pilai long Tunde dispela wik long Sir Ignatius Kilage stedium long Lae taim ol i brukim bun wantaim ol boi Kalibobo bilong Madang.

Ol boi bilong Madang i no bin pilai gut tumas na tim Sentral i autim ol wantaim 4-1 skoa long fultaim.

Bihain long tenpela minit long fes hap namba 7 bilong Sentral, Arua Koka, i bin kisim wanpela gutpela bal long maus bilong mak bilong madang stret na em i paiarim i go insait long umben. Em nau Sentral i bin lid 1-0.

Pilai i go strong gen na i lukim pawa bilong Sentral i kamap strong long straika bilong ol Wari Laka, husat i bin buletim wanpela gutpela kik we gol kipa

bilong Madang i no inap long holim. Long dispela taim Sentral i go pas 2-0.

Ol mangi bilak bokis yet i bin gat planti gutpela sans. Wanpela sans em taim namba 16 bilong Madang i bin abrusim tripela gutpela sans long skorim gol. Dispela drai i bin lukim skoa i sanap olsem i go painim hap taim.

Bihain long liklik hap taim tok-tok long kosa, ol mangi Madang i bin statim pilai wantaim strongpela ron we i bin helpim yangpela Henson Trimo long pairapim wanpela gutpela gol na brukim kiau bilong Madang. Em nau skoa i sanap Sentral 2, Madang 1.

Dispela namba wan gol i kirapim skin bilong Madang na tu ol sapota i singaut long strongim tingting bilong Madang. I no long taim Madang Kepten Peter Manda i setim Unasi Tonga na em i kikim i go

namel na namba 11, Mitix Levi i skorim wanpela gutpela gol tru long balensim skoa 2-2.

Tasol ol boi Sentral i no surik. Ol i kam yet na bringim gem i go strong tru.

Em nau 15 minit bipo long ful taim, straika bilong Sentral, Wari Laka i skorim las gol na lukim skoa i sindaun Sentral 3-Madang 2.

Tim opisal bilong Sentral, Leo Mark i tokim Wantok Spots olsem planti ol pilaia long tim bilong em i ol mangi bilong ples tasol.

Mista Mark i tok em na ol wan opisel bilong em i bilip ol boi bilong ol i ken strong na kamap long fainol.

Long ol narapela pilai, Tim Sentral i mekim gut tu we ol arapela tim bilong ol long pilai volibol na netbol i wok long winim ol medol.

Soka yet nau i lukim Kalibobo

Madang tim bilong ol man i aut long kwota fainol na Sentral i go tru long semi fainol raun we bai kamap long Fraide dispela wik.

Long arapela pilai long Stedium, ol susa bilong Madang Kalibobo i no laik aut long kwota fainol, we ol i mekim gutpela pilai na ol i win 4-1.

Ol meri bilong Westen i no bin strong na ol i bin lus long dispela kwota fainol. Nau ol meri Madang i gat sans long stap insait long semi fainol.

Long Madang sait bilong ol meri, ol lain olsem Kepten Theresia Kig na Rosa Lai em ol i pilai strong tru na rausim ol meri Westen husat em namba wan taim bilong ol long kamap long kain nesanel pilai olsem.

Tasol ol dispela meri Westen i no meri nating tu. Ol i bin pilaim tupela gem olsem taim ol i daunim Madang 4-0 na taim ol i autim Sauten Hailans 2-0.

Namba 3 PNG Gems Medal Tali

Posisen	Provins	Gol	Silva	Brons	Totol
1	NCD	13	4	3	20
2	Isten Hailans	11	12	7	30
3	Morobe	9	5	8	22
4	Westen Hailans	5	0	2	7
5	Simbu	1	3	1	5
6	Manus	1	2	1	4
7	Madang	1	2	0	3
8	Bogenvil	1	1	1	3
=9	Is Nu Briten	0	1	2	3
=9	Wes Nu Briten	0	1	2	3
=11	Westen	0	1	0	1
=11	Enga	0	1	0	1
	Sentral	0	0	0	0
	Is Sepik	0	0	0	0
	Galp	0	0	0	0
	Nu Ailan	0	0	0	0
	Oro	0	0	0	0
	Sandaun	0	0	0	0
	Sauten Hailans	0	0	0	0
Totol		42	33	27	102

Isten Hailans kamap strong long poin

Paulus Tali i raitim

OL yangpela 'Apo' meri bilong Goroka husat nau i stap long PNG Gems long Lae i no bin abrus na ol i kamapim gutpela pilai tru long mekim nem.

Wanpela yangpela meri Goroka em nem bilong em Amenda Landu. Em i gat 15 krismas na em bilong ples Unggai insait long Isten Hailans provins.


Kamap bilong em long namba 3 PNG Gems na em i no wanpela meri i save tubel taim em i apim ain long weiltifting.

Man, em i apim gut tru olsem man i apim ain na em i bin win.

Em i bin helpim ol arapela susa bilong em tu long winim pilai bilong ol long ol arapela divisen long weiltifting.

Tim Menesa bilong en, John Soni Soga i bin amamas tru na tokim Wantok Spots olsem ol meri bilong em i no wari long wanpela samting. Long taim bilong trening i kam inap ol i kamap na pilai long ol gems, em ol i strongim tingting long winim gol na ol i mekim pinis.


Long wankain taim, ol yangpela bilong Isten Hailans weiltifting tim i tok amamas long het kosa bilong ol em Freddy Nathaniel long gutpela skul na stia em i givim ol long mekim ol i winim gol.




STOPIM EM: Pastaim Mis PNG Geneveive Roberts tu i bin pilai netbol wantaim Goroka skwad long PNG Gems.



GOLF TU: Ol manmeri i bin pilai golf tu long PNG Gems.



WANTOK SPOTS



Isu 1739


Wan wik: Fonde, Novemba 22 - 28, 2007



TELIKOM PNG LIMITED
"your communication company"

IDD CALLS (INTERNATIONAL DIRECT DIALLING)

Yu ken ring lon olgeta hap insait lon PNG lon IDD phone igo lon olgeta kantri insait lon wol. Ringim Telikom Hotline lon 180 3999 lon kisim moa toksave.



Email: hotline@telikompng.com.pg

KISIM MOA TOKSAVE LON OL TELIKOM BISNIS OPIS STAP KLOSTU LON YU.

INSAIT

Lukim ol poto long 3rd PNG Gems



PES 34

Lukim moa spot stori

PES 35



NCD lid wantaim 13 Gol

- Isten Hailans go pas long namba
- Morobe ron namba tri
- Sampela spot pilai i pinis tasol ol arapela i ron yet

BIHAIN long de namba 5 bilong Namba 3 Papua Niugini Nesanel Gems, Isten Hailans i wok go pas long namba bilong olgeta medol ol i winim.

Tasol posisen namba wan i stap long han bilong Nesanel Kapitel Distrik (NCD) bihain long ol i win long namba bilong ol gol medol ol i kisim.

Mama provins bilong Gems, Morobe i wok ron namba tri wantaim 9-pela Gol bihain long Isten Hailans (11) na NCD husat i go pas wantaim 13 Gol.

● lukim moa long pes 35

Brian Bell Sports

Shop with a friend

HOME CENTRE CITY, GORDONS 325 8469
PLAZA, BORO KO 325 5411
KOKOPO 982 9027
MT HAGEN 542 1999
MADANG 852 1899
GOROKA 732 1622
LAE HOMECENTRE CITY 472 3200



FOR THE LARGEST RANGE OF GENUINE BRAND SPORTING EQUIPMENT IN PAPUA NEW GUINEA.

Publisher of the newspaper operates at Section 58, Allotment 3, Office 2, Waigani Drive

Wantok

Digitized version made available by



Copyright: Under copyright

Rights Holder: Word Publishing Company Limited

Use: This digital version is made available from the UC San Diego Library under a license granted by the Word Publishing Company Limited. This digital copy of the work is intended to support research, teaching, and private study.

Constraints: This work may be protected by copyright law. Use of this work beyond that allowed by the applicable copyright statute requires the written permission of the copyright holder(s). Responsibility for obtaining permissions for any use and distribution of this work rests exclusively with the user and not the UC San Diego Library. Inquiries can be made to the UC San Diego Library program having custody of the work.

Note on digitized version: Some of the digital versions presented here reflects the quality and contents of the microfiche. Problems which have been identified include misfiled or out-of-order pages, illegible text; these problems have been rectified whenever possible.